

## Meje Po Diboro Juan Tina Xua Yabara Tsiwanaya Tsita Itutatsi Pocotsiwa Exanaena Po Cae Pin Nacuathe

*Meje yabara po diwesi pocotsiwan xua Jesucristo Paxa tsita itutatsi xua pocotsiwan xuya Juan tsita itutatsi*

<sup>1</sup> Barapo diboroje xan Juan tinan. Pocotsiwan yabara tinan xua Nacom Jesucristo tsita itutatsi. Bara pocotsiwan Jesucristo xuya pijimonaetha tsiwanaeya tsita ituta pocotsiwan xua imoxoyo bara exanaenaba. Jesucristo pia matatsunpin inta itoroba xua xan Juan xuya tatsita itutatsinexa daxita baxuan xua imoxoyo bara exanaenaba.

<sup>2</sup> Daxota xan xuya xainwaichiya yabara tinan daxita xua pocotsiwa tan. Matautano tinanno xua jume tan xua Nacom paeba irano xua Jesucristo paeba.

<sup>3</sup> Pon xua yorobina jiwitha po diwese pomonaetha pomonae Nacom pejume cowuntsiwichi tatsi, bapon juntu coyene weiweina exanaeinchi xua Nacom juntu coyene weiweina exanaena. Irano pomonae jume tane barapo diwese yawano xua exanano xua pepaebixae barapo diwese, barapomonae juntu coyene weiweina exanaeinchiru. Daxota barapomonae juntu coyene weiweina tsipei baxuan imoxoyo exanaenaba.

*Meje yabara xua Juan tatina pomonae pejume cowuntsiwi, pomonae siete po matabuxumonaebe, pomonae nacaetuta xua Nacom wnae pejainchinexatsi*

<sup>4</sup> Xan, Juan, pacata tinatsi pomonae painya nejume cowuntsiwi pam pomonae siete po matabuxumonaebe pam xua painya nenacaetutsi jiwi pam, xua wnae painya nejainchinexa Nacom. Paxam pomonae Asia nacuathe pajinompame. Paca tsipaebatsi xua Nacom anoxuae

popona yawa caena bayatha popona yawa bexa ataya poponaena. Pacata wúcatsi Nacomtha xua painya nepaca jũntũ coyene weiweina exanaenexa tsane. Yawa pacata wúcatsi xua Nacom paca yawenaena pia painya nepaca caantobexae. Yawa pacata wúcatsi Nacom pia Pejumope tũnaxũ tatsi beya xua bapon baxuan pacata exanaena tsipei Nacom pia Pejumope tũnaxũ tatsi siete po pexeinya jũntũ coyenebe pexeinaein. Barapo Pejumope tũnaxũ Nacom peitabaratha tauncuatsi ichaxota Nacom eca pia pexeinya peecaethopaewatha. <sup>5</sup> Yawano pacata wúcatsi Jesucristotha xua bapon baxuan pacata exanaena. Barapon Jesucristo ataya xaniwaicha pepaebin. Bapon copiya equeicha asũ naexana. Bapon asũ canamata canaexana jiwi petũpae coyene weya. Yawa bapon itoroba pomonaetha pomonae itorobiya pepa peewatsiwi ichamonae po cae pin nacuathe. Cristo naca antobe daxota naca tsitũpa naetotha wanaca jũntũ coyene jũntemainenexa abe waexanae cuiru coyenewan. <sup>6</sup> Mataũtano Jesucristo naca exana xua piamonae tatsichi. Yawano sacerdotemonae naca cana exana watanacuichinexa tsainchi Nacom, pon Jesucristo Paxa tatsi. ¡Barabũ Nacom ataya xeinaena xua pexeinya jũntũ coyene xua peainya cui coyenewa! ¡Yawano barabũ Nacom ataya xeinaena xua pia peayapusũ itorobi coyenewa! Je, bara ichi tsane.

<sup>7</sup> ¡Matha pataema!

Cristo patopeicaena tsaquinaebowatha.

Daxita jiwi taena bapon

xua bapon taeinchi.

Irũrũ pomonae bapon cobe matatabarutatsi

naetotha bapon taeinchi.

Daxita nacuanpiwi, pomonae bapon jopa jume

cowũntichi, daxita barapomonae jũntũ coyene

wecoyei tsane poxonae bapon taeinchi.

Je bara ichi tsane.

<sup>8</sup> Nacom jeye: “Xan ponxaein apara ataya tsitecaeya tapoponaein xua poxonae aena daxita tamropata pitaban. Matautano bexano daxita coyenein wetsin tsipei ataya tsitecaeya bara tapoponaewa tsane”, jei Nacom pon jiwi Pecanamataxeinaein, pon itoroba pia peayapusu itorobi coyenewatha daxita nacuanmonae jiwitha. Bapon Nacom anoxuae popona, caena bayatha popona, yawa bexa tsane ataya poponaena.

*Meje yabara poxonae Cristo pia peitupanae tsita itutsi coyenewatha tatsi Juan tsita itutatsi*

<sup>9</sup> Xan Juan ponxaein be pon painya eweicho nanatsicotan Jesús pijimonaexaetsi. Icha jiwi paca ichi xua paca anthuthurewe exana xua poxonae jopa xapain pacata exanaeyo, anoxuae bara neichi. Jiwi anthuthurewe neexana tsipei waxainchi Nacom piamonaetsi jiwanatsi pomona Nacom itorobiya ewata. Tsipei Jesucristo paca yawena daxota cataunxuae pajume cowunta dubenanaebiyame Nacom, iru xandu barichin. Jiwi pecubi botha Patmos tunaetha neeta tapaebixae Nacom Pejume Diwesi yawano Jesús pejume diwesino tapaebixae.

<sup>10</sup> Caentaqueitha, po mataqueitha peseicae mataqueitha bichocono Nacom pia Pejumope tunaxu tatsi nejuntu coyene yuca exana. Tauma werena jume tan pejume xua bichocono jume daunweya ajumetsaca be poxonae icha xua oba po peobiwa pewun trompeta. <sup>11</sup> Nejei xua netsipaeba: “Xam yabara tinare diborotha daxita xua taneme. Barapo diboro bapoxonae caitorobare pomonaetha pomona tana nejume cowantsiwitha pomona siete po matabuxumonaebe pomonae nacaetuta xua Nacom wuna pejainchinexatsi. Barapomona jinompa Asia nacuatha. Barapo siete po matabuxumonaebe nacaetuta barompaya pia tomarantha tsiniya. Barapomona meje:

Efeso tomarapiwi, iru Esmirna tomarapiwi, iru Pergamo tomarapiwi, iru Tiatira tomarapiwi, iru Sardis tomarapiwi, iru Filadelfia tomarapiwi, iru Laodicea tomarapiwi”, nejei Jesucristo.

<sup>12</sup> Bapoxonae napatomeicha necotaban tayaputaenexa pon xua netsipaeba. Poxonae necoyan bapoxonae tan siete xoyobe penainwan xua po nain pewun oro nain xua pentatutuntha itanacanoba. <sup>13</sup> Barapo siete xoyobe xua ichaxota pentatutuntha itanacanoba baxoyo pia xainya deca pon be pebin taenotan. Pon uncuapa para ponxae itaboco wetsica pona, pon Nacom itapeta. Bapon naxatata paparuwa, po paparuwa apiya deca bichocono yawa taxu jayarecatsi. Yawa naepa cuta paparuwa po paparuwa bichocono pereca yawa juntacari jayatsinatsi yawa bichocono daedaena icha be oro nain ichi. <sup>14</sup> Pentanan tatsi bichocono inyapana icha be papu ichi, yawa icha be main axuto ichi. Yawano peitamaiqueitobe be isoto itareto. <sup>15</sup> Petaxu bichocono taxu daedaena icha be bronze nainto ichi xua bichocono nain daedaena poxonae cataunxuae isototha nain boquiya. Pejume bichocono ajumetsa be poxonae xua ainya menein busin. <sup>16</sup> Pemaxu coxa iya xeina siete po opiteitobe. Yawa pecoiboto tsina pichapeina cusi xua nantiya baru ducuabe. Peitabara bichocono daedaena icha be poxonae xometo ichi poxonae xua pentha xua poxonae atsa.

<sup>17</sup> Poxonae bapon Jesucristo tan, imoxoyo iratha nabotaban bapon peitabaratha. Bara be tatupaeyo nabotaban. Bapoxonae bapon pecobetha nejayaba po cobe pecoxa weya. Yawa Jesucristo nejei: “Jopa junuwinde. Xan ponxaein xua daxita taforotsin xua poxonae aena. Yawano xan ponxaein xua tawetsin tsane daxita xua bexa tsane. <sup>18</sup> Xan ponxaein xua copiya bayatha tapoponaein. Bequein bayatha tupan ichitha equeicha anoxuae asu poponan xua ataya petsitecaenexa. Nacom necata

taitorobi coyenewa xua petupaewi taitorobeibinexa petupaeyae coyene nacua beya. <sup>19</sup> Daxota yabara tinare xuaunxuae pocotsiwa taneme. Yawano yabara tinare xua aunxuae taeponaename. <sup>20</sup> Barapo siete opiteitobe xua taneme tacobe coxa weya yabara caunutatsi xua pomonae Nacom Pejume Diwesi pepaebiwi, pomonae Nacom pejume cowantsiwichi pecanamataxeinaewichi. Yawa barapo siete xoyobe xua pentatutuntha itanacanoba xua baxoyo pia xainya deca uncuana baxua yabara caunutatsi pomonae siete po tomarabe matabuxu jiwu, pomonae Nacom pejume cowantsiwichi”, jei Jesucristo pon xua uncuana.

## 2

### *Meje yabara xua po diwesi Juan tatina Efeso tomarapiwi*

<sup>1</sup> Jesucristo, pon xua uncuana nejei: “Tatinare pon Nacom Pejume Diwesi pepaebin pomonaetha tana nejume cowantsiwi pomonae Efeso tomaramonae xua bapon petayorobinexa xua barapomonae petayorobinexatsi. Jande: ‘Meje xua paeba pon pecobe coxa weya tatsi siete po opiteitobe tauncuatsi xuano xua uncuana siete xoyobe pia xainya deca xua ichaxota pentatutuntha itanacanoba. <sup>2</sup> Bapon jeye: Yaputan xua painta exaname po penacuichiwa xua daunwei xua jopa pabarpentsim. Yawano paca cui yaputainchi xua paaichaxaibim xua exana pomonae peajuntucoyenebewi. Yawano bara yaputan xua jopa paca itata cui xainyei tsaibiyo paxona xua ichamonae atsaquiya paca jei: Paxan Jesús pia peitorobiwi tatsi pan, jei. Bara paxam payaputaneme xua barapomonae pemuxuitorobiwi. <sup>3</sup> Beta pana juntu wunaetame. Matauta jopa paacoyenefaetabim, bequein ichamonae bichocono abe paca exana painya inta nacuichixaem. <sup>4</sup> Ichitha paca cui yaputainchi xua cae

coyene paexaname xua po coyene aichaxaibin. Anoxuae be conotha pana neantobem. Jopa be ichiyo poxonae copiya matha pana neantobem nawita. <sup>5</sup> Payabara nanta xeinare xua poxonae copiya pana nejume cowantame xua poxonae bichocono pana neantobem. Icha juntu coyene paxeinare. Painta exanare icha paichim xua poxonae matha copiya beta painta exaname. Icha jopa pana neantobem tsane, nainya patopaein, yawa pichin painyawa xua pocotsiwa ichaxota pentatutuntha paitanacanobame, xua pichin painya tomara weya. Apará xua jan, daxita painya nenacaetutsi jiwi pam pana nenepentaponaename xua pata tana nejume cowantsiwam xua daxota jopa pana nejume cowantsim tsane jan. <sup>6</sup> Daichitha cae coyenewa ichichipan xua paexaname. Juntu coyene weiweinan tsipei pananta xeiname icha ichin xua pocotsiwa nanta xeinan. Paxam paaichaxaibim pocotsiwa nicolaitamonae xua exana, pomonae bichocono abe peexanaewi. Xan iruru aichaxaibin xua pocotsiwa exana barapomonae. <sup>7</sup> Paxam pomonae painya nejume cowantsi jiwi pam. Icha pamuxu dubename, pajume naitaeware xua pocotsiwa Nacom pia Pejumope tunaxu tatsi paca tsipaeba. Bapon jeye: Pomonae xua Jesucristo jume cowanta dubenanaebiyaeinchi beya xua yacuiya werapaeya othopaena barapomonae catsin Nacom pia peitorobi nacua beicha peajuntuyarusüwa, po peajuntuyarusüwa xua jopa weraweracaeyo, jei Nacom pia Pejumope tunaxu tatsi, jei Nacom Pexanto', jande", nejei Jesucristo pon xua uncua barapo siete xoyobe xua pentatutuntha itanacanoba xua baxoyo pia xainya deca tatsi.

*Meje yabara po diwesi Juan tatina Esmirna tomarapiwi*

<sup>8</sup> Pon Jesucristo xua uncua equeicha nejei: "Barichinde tatinare pon Nacom Pejume Diwesi pepaebin pomonaetha tana nejume cowantsiwi pomonae Esmirna tomara-

monae, xua bapon petayorobinexa xua barapomonae petayorobinexatsi. Jande: ‘Meje xua paeba pon xua daxita forota poxonae aena. Yawano bapon daxita wetsina xua bexa tsane. Bequein bapon bayatha tupa ichitha equeicha asu popona xua ataya tsitecaeya tsane. <sup>9</sup> Bapon jeye: Yaputan daxita xua pocotsiwan paexaname. Bara paca tainchi xua paanthuthutanem poxonae xua ichamonae pacata abe exana. Bequein paca tainchi xua pacopeibim ichitha apara bara paxeinaename pocotsiwa bexa Nacom paca catsibina. Daxota paxam be copei pexeinae jiwi pam. Yaputan pomonae atsaquiya najei: Paxan judiomonae pan, jei. Barapomonae abe paca yabara paeba. Daichitha barapomonae u caurimonae pia pentacaponaein tatsi bapon piamonae tatsi. <sup>10</sup> Jopa pajunuwinde xua pocotsiwa ichamonae paca anthuthutane exanaena xua tsipei pacata abe exanaena. Caurimonae pia pentacaponaein tatsi itorobina ichuntha xua piraichi paca jiwana capanaena jiwi pecubi bo beya xua daxota daxita paxam painya nenacui barapentsiwa tsane xua painya nejume cowuntsiwa Nacom. Paxam paanthuthutanem tsane diez po matabibibe. Daichitha pana najuntu coyene daunweya wunaere beya poxonae payacuiya werapaeya othopaename. Bapoxonae paxam paca catsibinchi xua be pentoma xua peantuyapuswa po peantuyapuswa xua jopa weraweracaeyo. <sup>11</sup> Paxam pomonae painya nejume cowuntsi jiwi pam. Icha pamuxu dubename, moya pajume naitaware xua pocotsiwa Nacom pia Pejumope tñaxu tatsi paca tsipaeba. Bapon jeye: Pomonae xua Jesucristo jume cowunta dubenanaebiyaeinchi beya xua yacui werapaeya othopaena, Nacom jopa copatsi tsane xua barapomonae equeicha jopa ateneya werapae tsane, jei Nacom pia Pejumope tñaxu tatsi, jei Nacom Pexanto’, jande”, nejei Jesucristo pon xua uncua.

*Meje yabara xua po diwesi Juan tatina Pérgamo tomarapiwi*

<sup>12</sup> Pon Jesucristo xua uncua equeicha nejei: “Barichinde tatinare pon Nacom Pejume Diwesi pepaebin pomonaetha tana nejume cowuntsiwi pomonae Pérgamo tomaramonae xua barapon petayorobinexa xua barapomonae peyorobinexatsi. Jande: ‘Meje xua paeba pon pecoiboto tsina tapichapeinatsi cusi po wato nantiya baru ducuabe. <sup>13</sup> Bapon jeye: Bara yaputan xua daxita paexaname. Yawano yaputan xua painompame ichaxota caurimonae pia pentacaponaein tatsi itorobeiba xua barapo tomarapiwi itorobeibatsi. Daichitha awiya pana nejume cowunta dubenanaebiyame. Jopa pabarapentsinde xua pata tana nejume cowuntsiwam. Antipas bichocono nejume cowunta. Bequein bapon bexotsi painya xantha, daichitha awiya pana nejume cowunta dubenanaebiyame. Pomonae barapo tomaratha jinompa pomonae xua caurimonae pia pentacaponaein tatsi itorobeiba barapomonae Antipas bexotsi. <sup>14</sup> Daichitha paca cui yaputainchi xua icha coyenein paexaname, po coyenein xua jopa ichichipaeinyo. Paxeiname Pérgamo tomaratha pomonae xua painyamonae jiwana, pomonae barichi xua abe exana xua daxota jopa ichichipaeyo xua pepentsiwa xua pecuidubiwa pocotsiwa Balaam pia pecuidubi coyenewa tatsi. Bapon Balaam cuiduba, Balac cuidubatsi xua xuya Balac pecuidubinexa xua israelmonae pecuidubinexatsi xua israelmonae abe peexanaenexa. Po peabe coyene Balac cuiduba xua pinae israelmonae itacupatsi xua xane duwein po duwein poxonae bexuba ibo nacom nexa. Yawano Balac cuiduba xua pinae barapo israelmonae jopa abe exanaeyo poxonae nata siwa xeina dubenanaebiya yabuxi. <sup>15</sup> Barichi pomonae painyamonae jiwana pomonae abe exana, barapomonae ichichipa po pecuidubiwa pocotsiwa nicolaitamonae pia pecuidubi



coyenewa tatsi. Barapo nicolaitamonae pia pecuidubi coyenewa tatsi bichocono aichaxaibin. <sup>16</sup> Daxota icha jüntu coyene paxeinare. Icha jopa icha jüntu coyene paxeinaem, nainya jemeicha baxota patopaein yawa paca beinchi cusitha, po watotha xua tacoiboto pichapeina. <sup>17</sup> Paxam pomonae painya nejume cowuntsi jiwí pam. Icha pamuxu dubename, moya pajume naitaeware xua pocotsiwa Nacom pia Pejumope tñaxu tatsi paca tsi-paeba. Bapon jeye: Pomonae xua Jesucristo jume cowunta dubenanaebiyaeinchi beya xua yacui werapaeya othopaena, barapomonae catsin po pexaewa pewun maná, po pexaewa namicha boca xua ichamonae jopa yabara yaputaeyo. Yawa barapomonae catsin iboto, po iboto inyapana, barapo ibototha tinaena pena wun xua ichamonae jopa wun taeyo. Saya meisa wun yaputaena pon xua catsin barapo iboto, jei Nacom pia Pejumope tñaxu tatsi, jei Nacom Pexanto', jande", nejei Jesús pon xua uncua.

*Meje yabara po diwesi Juan tatina Tiatira tomarapiwi*

<sup>18</sup> Jesucristo pon uncua equeicha nejei: "Barichinde tatinare pon Nacom Pejume Diwesi pepaebin pomonaetha tana nejume cowuntsiwi pomonae Tiatira tomaramonae xua bapon petayorobinexa xua barapomonae petayorobinexatsi. Jande: 'Meje xua paeba Nacom Pexanto tatsi, pon peitamaiqueitobetha be isoto itareto tarucuatsi. Yawano bapon bichocono taxu daedaena be penainto, pocotsi nainto pewun bronze. <sup>19</sup> Bapon jeye: Yaputan daxita xua po coyene paexaname, yawano yaputan xua paxam pana neantobem. Yawano yaputan pocotsiwa painya tana nejume cowuntsiwam. Yawano yaputan xua pocotsiwa payawename ichamonae. Yawano yaputan xua saya beitatemaya jüntema painompame poxonae bequein ichamonae pacata abe exana. Yawano

yaputan xua anoxuae nawita paexanaponame beyacaincha xua poxonae copiya paexaname. <sup>20</sup> Daichitha paca cui yaputainchi xua pocotsiwa paexaname xua pocotsiwa aichaxaibin, xua jopa paitawetsim powa pewun Jezabel. Powa jei: Nacom nexa tapaebiwayon, jei. Daichitha tana nejume cowuntsi jiwi muxuitorobatsi. Barapowa Jezabel tamonaе cuidubatsi xua bara nata siwa xeineibina yabuxi. Yawa bapowa cuidubano po coyene aichaxaibin xua tamonaе jain itorobatsi xua tamonaе xaena duwein, po duwein poxonaе bexuba ibo nacom nexa. Barapo duwein jiwi cata ibo nacomtha poxonaе wnae jainta pia ibo nacom. <sup>21</sup> Caena bayatha ewatan xua bapowa icha juntu coyene pexeinaenexa, ichitha bapowa baxua jopa beexanaeyo. Bapowa jopa juniya exanaeyo xua abe exanaponeiba. <sup>22</sup> Xan exanaein xua nainya bapowa atene tsanaya tsane, xua camatha peboeaenexa, abe peexanaexae. Iruru pomonaе xua bapowa abe nanabaruru exainchi barapomonaе atene tsane exanaein xua icha barapomonaе jopa nacui barapentsi tsane pocotsiwa bapowa cuiduba. <sup>23</sup> Yawano bapowa pia pexui tatsi tajutebin. Bapoxonaе daxita pomonaе Nacom pejume cowuntsiwichi neyaputaena po coyene xua xan deta cou jiwi tanthuthu yaputaein daxita xua poxonaе exaneiba yawa daxita poxonaе xua nanta xeineiba. Bapoxonaе daxita paxam barompaya paca catsibinchi be xua pentoma. Pomonaе xua xanepanaya paexaname, xua wnae paca catsibinchi. Pomonaе xua abe paexaname, xua peatenewa paca catsibinchi. <sup>24</sup> Paca tsipaebatsi daxita pam pomonaе Tiatira tomarapiwi jiwana pam, xua pomonaе jopa paexanaem pocotsiwa xua Jezabel paca cuiduba, saya ichamonaе paxam jiwana pam, baxua exana. Paca tsipaebatsi pomonaе pam pomonaе jopa pananabaruru nacuidubim pocotsiwa caurimonaе pia pen-

tacaponaein tatsi pia coyenewan tatsi. Tsipei jopa paexanaem barapo coyenewa daxota jopa paca itorobi tsainchi icha coyene xua painya neexanaewa tsane, po coyene bichocono ayapube. <sup>25</sup> Daichitha awiya pana nejume cowanta dubenanaebiyama beya poxonae eque-icha patopeicaein. <sup>26</sup> Awiya pajume cowanta dubenanaebiyama Nacom painya amanayabinexa tsane caurimona. Yawa awiya paexana dubenanaebiyama pocotsiwa xua xan ichichipan xua beya payacui werapaeya othopaename. Pomona baxua exanaena, barapomona catsin taayapusu itorobi coyenewa xua peitorobeibinexa tsane po cae pin nacuathepiwi. <sup>27</sup> Paca catsibinchi taitorobi coyenewa icha Taxa neichi xua necata pia peitorobi coyenewa. Icha pebin ichi xua poxona barapon daunweya wacataxuba juruwato penaintotha xua peexanaenexa pexuruxixi, bara jata ichi tsane pomona nejume cowanta. Barapomona daunweya itorobina barapo cae pin nacuathepiwi beya poxona daxita werawera-caena abe peexanaexae. <sup>28</sup> Bapoxona yawa paca catsibinchi po coyene xua tapaca baru poponaewatsi. Barapo coyene bichocono wuna tsane, icha jarawato ichi xua jiwi bichocono tsita wunaetsi poto mataquei pewunaeya ecoina. <sup>29</sup> Paxam pomona painya nejume cowantsi jiwi pam. Icha pamuxu dubename, moya pajume naitaeware xua pocotsiwa Nacom pia Pejumope tunaxu tatsi paca tsipaeba, jei Nacom Pexanto', jande", nejei Jesús, pon xua uncua.

### 3

#### *Meje yabara po diwesi Juan tatina Sardis tomarapiwi*

<sup>1</sup> Jesucristo, pon xua uncua siete xoyobe pia xainya deca xua ichaxota pentatutuntha itanacanoba, equeicha nejei: “Barichinde tatinare pon Nacom Pejume Diwesi

pepaebin pomonaetha tana nejume cowuntsiwi pomonae Sardis tomaramonae xua bapon petayorobinexa xua barapomonae petayorobinexa. Jande: 'Meje xua paeba Jesucristo pon xua xeina siete po pexeinya jũntũ coyenebe, po coyenebe xua Nacom pia Pejumoƿe tũnaxũ tatsi Jesucristo catatsi. Yawa bapon xeina siete po opiteitobe pecobe weya, po cobe pecoxa weya. Bapon jeye: Yaputan daxita xua paxam paexaname. Bequein jiwi paca yabara nanta xeina xua paxam painta beta exaname, daichitha apara jopa painta beta exanaem. Daxota paxam netsita be pomonae pewerapae jiwi pam. <sup>2</sup> Pana najũntũ coyene tsacabare. Payawende pomonae tana nejume cowuntsiwi xua pejũntũ coyene wũnae nexa, tsipei barapomonae be pewerapaewi pejũntũ coyene natsepaexae. Paca tainchi xua pocotsiwa paexaname. Baxua jopa Nacom tsita wũnaetsi. <sup>3</sup> Daxota pananta xeinare xua pocotsiwa bayatha paca cuiduba. Bapoxonae bapocotsiwa paexande yawano bapoxonae icha jũntũ coyene paxeinare Nacomtha xua equeicha caewa painya nejume cowuntsiwa tsane. Icha jopa baxua paexanaem tsane, bapoxonae nainya jemeicha patopaein paxamtha poxonae jopa payaputaem xua patopaein. Exanaein icha be pocotsin pon pecaibin ichi xua jemeicha patopa. <sup>4</sup> Daichitha paxeiname barapo tomaratha, Sardis tomaratha, pomonae tana nejume cowuntsiwi. Barapomonae penthũthũ xeicae jiwi. Jopa xeinaeyo po coyene xua peajũntũcoyenebewa tsipei jopa abe exanaeyo. Barapomonae nebarũ jinompaena. Yawa nama xatabina paparuwan, po paparuwan inyapana tsipei barapomonae exana dubenanaebiya pocotsiwa xua itoroban. <sup>5</sup> Pomonae xua nejume cowũnta dubenanaebiyaena xua beya yacui werapaeya othopaena barapomonae nama xatabina po paparuwan inyapana. Yawa pomonae wũn dubena Nacom pia diborotha xua

pomonaе ataya pejinompaenexa tsane xua jopa werawer-acaeyo, barapomonaе jopa wɯn iquicaein tsane. Yawano wɯn yaputane exanaein Taxa Nacomtha yawano Nacom pia matatsunpiwi tatsi peitabarathano. <sup>6</sup>Paxam pomonaе painya nejume cowɯntsi jiwi pam. Icha pamuxu dube-name, moya pajume naitaeware xua pocotsiwa Nacom pia Pejumope tɯnaxɯ tatsi paca tsipaeba, jei Nacom Pexanto’, jande”, nejei Jesúс pon xua uncua.

*Meje yabara po diwesi Juan tatina Filadelfia tomarapiwi*

<sup>7</sup>Equeicha Jesucristo pon xua uncua nejei: “Barichinde tatinare pon Nacom Pejume Diwesi pepaebin pomonaetha tana nejume cowɯntsiwi pomonaе Filadelfia tomara-piwi xua bapon petayorobinexa xua barapomonaе petay-orobinexatsi. Jande: ‘Nacom Pexanto tatsi, bapon bi-chocono pejɯntɯ coyene xanepanaein Nacomtha xua jopa penatsicuentaе Nacomtha xua abe peexanaexae. Yawa bapon bara xaniwaicha pepaebin. Yawa bapon pon naca yawena xua patinchi Nacom pia peitorobi nacua beicha. Bapon naca yawenaena icha matha pon peboupa peewatsin ichi xua poxonaе David yawenatsi. Bapon pon peboupa peewatsin David taewatatsi pia pexeinya peecaethopeibi bo tatsi. Bapon David pon caena bay-atha Israel nacua monaе itorobiya pia pepa peewatsinchi. Bapon pon peboupa peewatsin pia peitorobi coyenewa xeina xua poxonaе bapon peboupa saranaxuba ichɯn jopa itacɯpaetsi xua peboupa xatataba. Yawa poxonaе bapon peboupa xatataba ichɯn jopa itacɯpaetsi xua saranaxuba. Icha bapon ichi, barichi Nacom Pexanto tatsi pia peitorobi coyenewa xeina. Bapon copata xua pijimonaе tatsi patsina Nacom pia nacua beicha. Yawano jopa copatsiyo xua ichamonae patsina Nacom pia nacua tatsi beicha. Ichɯn jopa itacɯpaetsi xua ichawa paeba Nacom Pexanto tatsi beya. Anoxuae nama Nacom Pexanto paca tsipaeba,

jeye: <sup>8</sup> Yaputan xua daxita paexaname. Xan copatan xua tajume diwesi pacaponame ichamonaetha. Ichun jopa itacupaetsi xua paca jume itaweta xua daxota jopa painya necaponaewa barapo diwesi. Bequein saya tsiwiyo paajuntucicoyenesum, daichitha awiya tajume diwesi pacueicueijam yawa jopa pana nepentsim xua painya tana nejume cowuntsiwam. <sup>9</sup> Ichitha pomonae naerabiya jei: Paxan, judiomonae pan, jei, barapomonae, Satanás, caurimonae pia pentacaponaein tatsi bapon piamonae tatsi tsipei jopa benejume cowuntsiyo. Xan exanaein xua barapomonae patsina paxantha pentabocototha peumenaenexa tsane painya itabaratha wunae painya nepaca jainchinexa tsane. Bapoxonae barapomonae yaputaena xua xan tapaca caantobewichi pam. <sup>10</sup> Pajume cowuntsiya exana dubenanaebiyama po coyene xua paca itorobatsi xua beitemaya painompame xua jopa painya neaitaconaewa poxonae bequein ichamonae paca yabara abe exana. Daxota barapo matacabi, po mataqueitha poxonae caurimonae pia pentacaponaein tatsi daxita barapo cae pin nacuathe jiwi juntu coyene jujutinchi, poxonae jiwi bichocono atene exanaeinchi bara paca capanenebiya exanaeinchi. Caurimonae pia pentacaponaein tatsi juntu coyene jujutsina pomonaetha pomonae Nacom pejume cowuntsiwichi poxonae bichocono atene exanaeinchi xua daxota Nacom jopa pejume cowuntsiwa tsainchi. <sup>11</sup> Imoxoyo patopeicaein. Xaniwaicha beta paxeinare pocotsiwa xua tapana nejume cowuntsiwam xua bexa Nacom paca catsina pocotsiwa paca juntana jeba pia nacuatheicha beta painya tana nejume cowunta dubenanaebiyaexaemxae. Jopa pacopatsinde xua ichun paca exanaena xua abe painya neexanaewa tsane xua daxota jopa painya nexainaewa tsane pocotsiwa paca juntana jeba pia nacuatheicha. <sup>12</sup> Pomonae

xua nejume cowunta dubenanaebiyaena barapomonaе bichocono juntu coyene ayapusya daunweya exanaein xua pepatsinexa tsane Nacom pia nacula beicha. Bapoxonaе bapana jopa ponae tsane Nacom pia nacula weya. Bapoxonaе barapomonaetha catsin po wun Taxa Nacom pewun, xua jiwi peyaputaenexa xua barapomonaе apara Nacom piamonaе tatsi. Yawa catsin po wun pena Jerusalen tomara pewun, po tomara Nacom pia tomara tatsi ichaxota jinompa pomonaе peantobewichi Nacom. Barapo Jerusalen tomara itaboco wetsica pona ichaxoteicha xua Tanacom popona. Yawano catsin barapomonaetha tawun, po wun pena wun. <sup>13</sup> Paxam pomonaе painya nejume cowuntsi jiwi pam. Icha pamuxu dubename, moya pajume naitaeware xua pocotsiwa Nacom pia Pejumope tunaxu tatsi paca tsipaeba, jei Nacom Pexanto', jande", nejei Jesus pon xua uncua.

*Meje yabara po diwesi Juan tatina Laodicea tomarapiwi*

<sup>14</sup> Jesucristo, pon xua uncua siete xoyobe pia xainya deca xua ichaxota pentatutuntha itanacanoba, equeicha nejei: "Barichinde tatinare pon Nacom Pejume Diwesi pepaebin pomonaetha tana nejume cowuntsiwi, pomonaе Laodicea tomarapiwi xua bapon petayorobinexa xua barapomonaе petayorobinexa. Jande: 'Meje xua paeba pon xaniwaicha pepaebin pon xua xaniwaicha beta naca yabara caunutsiya paeba Nacomtha. Pon xua caena bayatha daxita forota. <sup>15-16</sup> Yaputan daxita pocotsiwa paxam paexaname. Paxam paca tsipaebatsi xua be paichimje: Ichamonaе ba aichaxaibi xua apa poxonaе po mera mene tuna xuano xua poxonaе aque aibi yawa poxonaе atou aibi. Bapoxonaе mene sutabina. Paxam be barapocotsi mera pana nacayabara tsicotaneme. Paxam conotha pana nejume cowuntame. Jopa panepentsim xua pata tana

nejume cowũntsiwam. Mataũtano jopa bichocono paichichipaem xua painya neexanaewa pocotsiwa paca itorobatsi. Daxota anaya paca xubinchi tsipei conotha pana nejume cowũntame icha xua pebin ichi xua anaya mene sutabina tsipei mene tuna. <sup>17</sup> Payabara paebame po coyene xua copei painya nexeiaewi pam. Yawa payabara paebame po coyene xua painya coutha pana nayaweneibame xua jopa pacata acobi tsaibiyo xua pocotsiwan panantawenoname. Ichitha jopa payaputaebenaem xua pocotsiwa paca yabara nanta xeinatsi xua pebiwi tsobenae, paca yabara jeichi. Mataũtano jopa payaputaem xua paxam be pomonae peacopeibiwi pana natsicotaneme. Yawano be pomonae peitata nacutsi jiwi pana natsicotaneme. Yawano be pomonae tamasaina pana natsicotaneme. Aparaxua jan: Paxam be barapomonae pam tsipei jopa beta painya jũntũ coyenewatha pana nejume cowũntsim. Yawa jopa beta painta nacuichim, jan. <sup>18</sup> Daxota paca tsipaebatsi. Pana necomocare po penainwan pewũn oro nain po nain xua daunwei xua poxoru isototha pesetsixae xua pexubinexa pocotsiwa abe. Bapoxonae xaniwaicha bara copei painya nexeiaewi pam tsane. Yawano pana necomocare po paparuwan inyapana tha tapaca cajuma xatabinexa tsane, tha tapaca cajuma acabinexatsi xua pajumasainame xua painya neauraxae. Mataũtano pana necomocare pewũwa tabotsinexa painya itamaiqueitha bapoxonae beta pataename. Aparaxua jan: Pana newũcare xua poxonae po coyene xua beta paca jũntũ coyene exanaeinchi xua jopa painya nexeiaewam tsane painya jũntũ coyeneintha, pocotsiwa xua abe, jan. <sup>19</sup> Pomonae xua antobein cui itawetan xua abe exana. Equeicha cuiduban xua jopa peexanaenexa baxuan. Yawano bichocono pana nejume cowũnde yawano icha jũntũ coyene paxeinare. <sup>20</sup> Pataema bo coibototha uncuan yawa wawan. Icha pebin



nejume tane yawa inta coibo sarana xorena bara joniyan yawa bara pana nabaꝛꝛ xanbe pia bothaxae. <sup>21</sup> Taxa jume cowanta ducuaenaebiyān xua neitoroba beya xua poxonaē bayatha tapan. Daxota Taxa necopata xua taecaenexa imoxoyo ichaxota Taxa pia pexeinya peecaethopeibiwa tatsi tauncuatsi. Icha Taxa neichi baxua, barichin tsane pomonaetha pomonaē tana nejume cowantsiwi. Pomonaē nejume cowanta dubenanaebiyaena xua itoroban, xua beya yacui werapaeya othopaena, barapomonaē copatsin xua peenaenexa ichaxota imoxoyo pexeinya taequeibithopeibiwa inta uncua. <sup>22</sup> Paxam pomonaē painya nejume cowantsi jiwī pam. Icha pamuxu dubename, moya pajume naitaeware xua pocotsiwa Nacom pia Pejumope tūnaxū tatsi paca tsipaeba, jei Nacom Pexanto', jande", nejei Jesús pon xua uncua.

#### 4

*Meje yabara po diwesi xua xuan Juan tsita nait* tatsi peitabocotha

<sup>1</sup> Poxonaē baxua weta, tan peitabocotha be bo boupa xua boupa yeyetanota. Yawano jume tan pejume, po jume xua copiya jume tan, po jume xua bichocono jume daunweya ajumetsaca be poxonaē xua oba po peobiwa pewūn trompeta. Bapon Jesús nejei: "Anetha tsinande taxainya betsina. Catsita itūtsinchi xua pocotsiwa bexa tsane exanaena", nejei Jesús.

<sup>2</sup> Bapoxonaē nama bichocono Nacom pia Pejumope tūnaxū tatsi nejūntū yūca exana. Peitabocotha tan xua ducua pocotsiwa pexeinya peenaethopeibiwa, yawano tan pon xua equiya baxota. <sup>3</sup> Pon xua equiya baxoteicha bichocono itabara daedaena icha iboto ichi pocotsi iboto xua bichocono daedaena pocotsi iboto xua bichocono ainya matoma, po iboto pewūn jaspe,

yawa be pocotsi iboto pewun cornalina. Yawano matawacaicha matatsun uncueicatsi coinwawa. Barapo coinwawa bichocono sɔjeya penta exana icha iboto ichi pocotsi iboto pewun esmeralda. <sup>4</sup> Barapo pex-einya peecaethopeibiwa pia matawacaicha tatsi, tan icha peenaethopeibiwān veinticuatro po peenaethopeibiwān xoyobe. Barapo peenaethopeibiwāntha ena pitiri jiwi xua matauta veinticuatro poyobe. Yawano barapo pitiri jiwi nama xataba paparuwan, po paparuwan inyapana yawano nanta xataba pocotsiwa be tepa xua penainwan, po penainwan pewun oro nain. <sup>5</sup> Barapo pexeinya peecaethopeibiwa weya be yamɔxɔ busi xua jurujurei. Yawano jerajerei. Yawano barapo peecaethopeibiwa peitabaratha tatsi umena pecoicha be xua pocotsiwa banaxu. Barapo siete banaxutobe coichabe yabara caunuta xua Nacom pia Pejumope tɔnaxɔ tatsi xeina siete po pexeinya jɔntɔ coyenebe. <sup>6</sup> Barapo peecaethopeibiwa peitabaratha ducua xua pocotsiwa penta pocotsiwa icha pin mene mar ichi xua mene itarana yawa icha bosibɔ muxupawa ichi xua penthiya.

Barapo peecaethopeibiwa baxota imoxoyo umena cuatro poyobe pocotsiwa xua asɔ. Barapo cuatro poyobe nantiyan itamaiquei dubena peitabara weyano yawa peɔma werenano. <sup>7</sup> Barapo cuatro poyobe jiwana xua xuan asɔ, pon copiya be neuthɔ itabara, irɔ ichɔn be vaca pebto itabara, irɔ ichɔn be jiton itabara, irɔ ichɔn be cotsara itabara, pon pepupunaein. <sup>8</sup> Barapo cuatro poyobe daxita barompaya xeina seis po cuarafeinbe. Matautano barompaya ainya itamaiquei xeina daxita matapaeicha pepontha yawano matha iya itamaiquei dubeinya. Mataqueitha, merawithano jopa cuinaya nājume copababiyo xua cueicueije Nacomtha pon xua eca barapo pia peecaethopeibiwatha, jeye:

## APOCALIPSIS 4:9 19 APOCALIPSIS 4:11

“¡Xam pon bichocono nejuntũ coyene xanepanaem,  
xua bapana jopa nexeiñawa abe peexanaewa!  
¡Xam pon jiwi Necanamataxeinaem!  
¡Xam Nacom, pon neayapusũ itorobi  
coyenewa xeiname!  
¡Xam pon caena bayatha poponeibame xuano  
xua anoxuae poponeibame xuano xua bexa  
ataya tsitecaeya poponaename!”  
jei barapo cuatro poyobe poxonaem  
cueicueijei Nacomtha.

<sup>9</sup> Pon xua pexeinya pia peecaethopeibiwatha eca, pon xua ataya popona, bapon wũnae jaintatsi, barapo cuatro poyobe wũnae jainta. Baxua exana tsipei bapon pexeinya juntũ coyene pexeinaein, matautano tsipei bapon ainya cui coyenewan peexanaein. Matautano bapon jeichichi: “Maisa pajuntũ coyene weiweinan pocotsiwan pata tana necatsixaemxae”, jeichichi bapon. <sup>10</sup> Poxonaem barapo cuatro poyobe wũnae jainta, bapoxonaerũ pitiri jiwi xua veinticuatro poyobe xua barompaya pia peenaethopeibiwatha ena, barapomonae irũ pentabocototha umena xua wũnae pejainchinexatsi pon ataya pepoponeibin. Yawa barapo veinticuatro poyobe nanta tepa wejonapenta. Bapoxonaem jeba pon ataya pepoponaein peitabaratha tatsi. Bapoxonaem jeye:

<sup>11</sup> “Pata Tanecanamataxeinaem,  
yawano xam pata Nacom.

Maisa wũnae xua paexana dubenanaebiyã  
ichamonaetha pata yabara cueicueijeinexa  
jinya pexeinya juntũ coyene yawa jinya  
pexeinya ainya cui coyenewan, yawano  
jinya neayapusũ itorobi coyenewa.  
Baxuan paexanan tsipei xam daxita forotame.  
Tsipei xam neichichipaexae daxota baxuan

forotame”, jei barapo pitiri jiwi.

## 5

*Meje yabara po diwesi xua poxonae Juan tane Nacom pia diboro*

<sup>1</sup> Bapoxonae tan diboro pecobe weya, po cobe pecoxa weya xua pon xua eca peecaethopeibiwatha. Barapo diboro quiyontsiya matuba yawano barapo diboro nantiyabe muxunene tina yawa catsababa siete xoyobe xua pocotsiwa pecatsababiwa. <sup>2</sup> Yawano tan matatsunpin pon peitorobi coyenewa xeina. Yawano jume daunweya yainyaba jeye: “¿Jintam Nacom tsitatsi pon pejuntũ coyene xanepanaein pontha pon xua Nacom daxota copatsina xua barapo pecatsatabiwa petsitsinaxubiwa tsane xua pepataxubiwa tsane barapo diboro?” jei bapon. <sup>3</sup> Ichitha dapocotsin aibi pon itabocotha popona, irũ pon xua popona po irathe, irũ pon popona po ire peũma bereca. Tsipei dapon aibi pon bichocono pejuntũ coyene xanepanaein xua pontha pon Nacom copata xua peitacũpaewatsi xua pepataxubiwa tsane yawa xua pey-orobiwa tsane barapo diboro. <sup>4</sup> Bapoxonae bichocono wecoyan tsipei dapon aibi pon xua bichocono pejuntũ coyene xeicaein xua pon itacũpatsi pepataxubiwa tsane yawa xua pey-orobiwa tsane barapo diboro. <sup>5</sup> Bapoxonae caein barapo pitiri jiwi, nejjei: “Jopa equeicha wecoyande. Tsipei pon uncua pon wũn dutatsi: ‘León’, jei xua po wũn jei: ‘neuthũ’, jei bapontha Nacom copata xua exana baxua tsipei pia peayapusũ itorobiwa canamataxeina. Apra bapon Judá piamonae jiwi jiwana tatsi, pon Judá caena bayatha tũpa. Barichi bapon apra David pia pemomoxi susato jiwana tatsi, pon David Judea nacuapiwi itorobiya pia pepa peewatsinchi caena bayatha. Saya meisa bapontha Nacom copata xua itacũpatsi xua tsitacutsina

barapo siete xoyobe xua catsataba barapo diboro peamanayabixae xua poxonaе equeicha caewa asu poxonaе tupa naetotha”, jei pitirin.

<sup>6</sup> Bapoxonaе tan Cordero xua oveja pebto penen, pon uncua Nacom pia pexeinya pecaethopeibiwatha peitabaratha tatsi yawa xua barapo cuatro poyobe peitabaratha tatsi xua xuan asu, yawano pitiri jiwi pia xainya deca tatsi. Barapo Cordero uncua bequein wan xeina xua poxonaе bayatha tsibexotsi jiwi abe pia pexanae cuiru coyenein tatsi. Barapo Cordero siete po itamaiqueitobe xeina matautano siete pontetobe xeina. Barapo siete itamaiqueitobe yabara caunuta siete po pexeinya juntu coyenebe xua Nacom pia Pejumope tunaxu tatsi xeina. Nacom najumope itoroba daxita irantha.

<sup>7</sup> Barapo Cordero wecobe pita barapo diboro pecobe weya, po cobe pecoxa weya tatsi pon xua eca pia pexeinya pecaethopeibiwatha. <sup>8</sup> Poxonaе Cordero pita barapo diboro, bapoxonaе barapo veinticuatro pitiri jiwi, iru cuatro poyobe xua xuan asu daxita barapomonaе pentabocototha umena barapo Cordero peitabaratha tatsi. Daxita barapo pitiri jiwi barompaya xeina xua pocotsiwan pexeinya petambabiwan pocotsiwan pewun arpa. Yawano barompaya xeina pocotsiwan pecaapaewan xua pocotsiwan pewun oro nain. Yawa barapo pecaapaewixitha wunba xua pocotsiwan petuxueiwan pocotsiwa tuxusi benata poxonaе tauta. Barapo petuxueiwa yabara caunuta xua pocotsiwa poxonaе pewucaewa Nacomtha pomonaе xua Nacom piamonaе, pomonaе pia peantobewichi tatsi.

<sup>9</sup> Barapomonaе pena wei naxuna, jeye:

“Xam maisa pon bichocono nejuntu coyene xanepanaein xua netsitsinaxubiwa barapo siete xoyobe xua catsataba barapo diboro.

Tsipei bayatha pana netsitupame poxonaе

painta pentoma exaname pata naexanaenexa  
tsane Nacom piamonae tatsi.

Yawano jiwana itapetame, pomonae tsicamonaexi  
xua daxita carepaya tsicamonaexitha xua  
necajume cowũntsiwa tsane.

Mataũtano jiwana itapetame daxita i dapomonae,  
pomonae barompaya icha jume penatsipaebiwa.

Mataũtano daxita carepaya tomaranpiwi  
jiwana itapetame.

Mataũtano daxita carepaya nacuanpiwi  
jiwana itapetame.

<sup>10</sup> Pana necana exaname be pomonae jiwi itorobiya  
pia pepa peewatsiwichi tatsi pan.

Yawa pana exanameno be pomonae  
sacerdotemonaepiwi pan xua Nacom  
pata tanacuichinexa.

Yawano pana exaname pata itorobiya  
ewatsinexa po cae pin nacuathepiwi”,  
jei barapomonae poxonae naxũna.

<sup>11</sup> Bapoxonae necotan, yawan jume tan xua bichocono  
pinmonae juinya pomonae Nacom pia matatsunpiwi,  
xua juinya barapo pexeinya peecaethopeibiwatha  
matawacaicha umena, yawa xua juinya barapo pitiri jiwi  
matawacaicha umeinchi, yawa xua juinya matawacaicha  
umeinchi barapo cuatro poyobe xua xuan asũ. Pomonae  
jume tan bichocono ayei jiwi cũcũjei. <sup>12</sup> Bapoxonae  
barapomonae bichocono jume daunweya paeba, jeye:

“¡Cordero, po Cordero bayatha jiwi tsibexotsi  
abe pia peexanae coyenewan tatsi,  
maisã barapo Cordero Nacom tsita  
jũntũ coyene xanepanatsi!

Daxota Nacom copata xua bapon xeina  
pia peayapusũ itorobi coyenewa.

Mataũtano Nacom copata xua bapon xeina

daxita pocotsiwan xua Nacom xeina.  
 Yawano xeina pia peyaputae coyenewan.  
 Yawano xeina pia peayapuswa xua  
 daunweya peexanaewa.

Matautano jiwi bewa baru cui  
 itura jinaena barapon pon Cordero.  
 Matautano jiwi bewa wuna jainchina  
 barapon pon Cordero.

Matautano jiwi bewa beta exanae juntu  
 coyene weiweina peexanaenexatsi bapon xua  
 petsitupaexae jiwi abe pia peexanae cuiru  
 coyenein tatsi”, jei barapo matatsunpiwi.

<sup>13</sup> Yawano equeicha jume tan daxita pomonae caena  
 bayatha Nacom forota: pomonae peitabocotha forotatsi,  
 iruno pomonae po cae pin nacuathe forotatsi, iruno  
 pomonae po ire peuma wetsina forotatsi. Yawano jume  
 tan xua pocotsiwan pin mene mar mentha jinompa.  
 Daxita baxuan carepaya Nacom forota. Jume tan xua jeye:  
 “Xam Nacom, pon ecame jinya pexeinya  
 neecaethopeibiwatha iruno xam Corderom,  
 barabu ataya juntu coyene weiweina  
 paca exanaenabe xua jiwi juntu coyene  
 weiweina paca exanaenabe xua  
 pocotsiwa painya neexanaexaebe.  
 Barabu daxita jiwi paca baru cui  
 itura jineibinabe.  
 Yawano barabu daxita jiwi wuna  
 paca jainteibinabe.  
 Yawano barabu paxeineibinamebe peayapuswa  
 xua daunweya painya neexaneibiwabe.  
 Daxita barapo coyenein ataya tsitecaeya  
 paxeineibinamebe”, jei daxita  
 barapomonae, pomonae Nacom forota.

<sup>14</sup> Barapo cuatro poyobe xua xuan asu, jeye: “¡Bara bara, bara baxua exanaena!” jei. Pitiri jiwi, pomonae veinticuatro poyobe, pentabocototha umena, xua Nacom wuna pejainchinexatsi, pon ataya tsitecaeya popona.

## 6

*Meje yabara po diwesi xua siete xoyobe xua xuan pecatsababiwan*

<sup>1</sup> Bapoxonae tan poxonae Cordero tsitsinaxuba caewa xua catsataba. Bapoxonae caein jiwana pomonae cuatro poyobe xua xuan asu jume tan xua daunweya paeba xua be yamuxu busi, nejei: “¡Anetha, taema!” jei. <sup>2</sup> Bapoxonae tan cawayu permainan. Pon cawayutha equeica, bapon bicheibi caequeica. Bapon pexeinya tepa catatsi penamata xatatsinexa. Bapon cawayutha ponataba xua beta penabinexa. Bapon amanayaba pia peaitafaetabiwichi.

<sup>3</sup> Poxonae Cordero equeicha tsitsinaxuba icha pecatsatabiwa, bapoxonae barapo cuatro poyobe jiwana xua xuan asu jume tan, nejei: “¡Anetha, taema!” jei. <sup>4</sup> Equeicha patopa ichun cawayu petsobian. Pon tsijuma equeica, bapon catatsi peayapusu itorobi coyenewa xua jiwi pejuntu coyene wepuxana exanaenexatsi po coyene xua juntema pejinompaewa. Yawano peexanaenexa xua pebiwi penajutebinexa. Matautano bapon pin dejona catatsi.

<sup>5</sup> Poxonae Cordero equeicha tsitsinaxuba icha pecatsatabiwa, bapoxonae equeicha barapo cuatro poyobe jiwana xua xuan asu jume tan, nejei: “¡Anetha, taema!” jei. Equeicha cawayu tan petsaebian. Pon tsijuma equeica, bapon comaequeica pocotsiwa pepesabiwa. <sup>6</sup> Bapoxonae barapo cuatro poyobe pia xantha jume tan xua nejei: “Saya cae kilo trigo xu cae denario nantomatsina, pocotsi paratixi xua nantomata caentaqueitha poxonae nacuita. Yawano



tres po kilobe cebada beno cae denario nantomatsina pocotsi paratixi xua nantomata caentaqueitha poxonae nacuita. Ichitha jopa copatsin tsane xua abe exanaena aceite mera yawano vino mera”, jei pon jume tan.

<sup>7</sup> Barapoxonae barapo cuatro poyobe xua opi ducua-naya jume tan yawa nejei: “¡Anetha, taema!” jei. <sup>8</sup> Bapoxonae cawayu ichun tan pon na daena. Pon tsi-juma equeica wun dutatsi: “Pon Petupaein”, jei. Barapo cawayu peputha tapoinchi ichun cawayu. Pon tsijuma equeica wun dutatsi: “Petupaewa Nacua”, jei. Pon tsi-juma equeicabe baponbe catatsibe Cordero pia peayapusu itorobi coyenewa tatsi xua baponbe pejiwana bexubinexabe poxonae cuatro poyobe necotabe pomona po cae pin nacuathe jinompe, yawano xua pejutebinexabe poxonae jiwi naba, yawano pejutebinexabe poxonae jiwi piyain poxoru pexaewa aibi tsane, yawano pejutebinexabe poxonae jiwi atene, yawano pejutebinexabe unupiwi xua xuan bichocono anaepana.

<sup>9</sup> Poxonae Cordero tsitsinaxuba ichaxota xua cinco po cuiyobe xua pecatsatabiwa, bapoxona tan xua be pexaethopaewa ichaxota tauteiba duwei xua tuxusi exaneiba Nacom nexa. Baraxua xua be pexaethopaewa juma bereca tan pomona bayatha jutebatsi ichamona, pecapon-aexae Nacom Pejume Diwesi xua amsiya awiya pecue-icueijeixae. <sup>10</sup> Pomona xua bayatha jutebatsi ichamona, barapomona jume daunweya paeba, jeye: “Nacom ponxaem pepa Necanamataxeinaem daxita jiwi, Nacom ponxaem bichocono nejuntu coyene xeicaem. Xam ponxaem pocotsiwan yabara tsiwuna muxu dubame baxuan xaniwaicha exaname. ¿Eta poxona exanaename xua poxonae jiwi yabara paebiname xua penatsicuentsiwa xua abe pexanaexae, xuano xua pana yantomatsiname xua nejutebinexa pomona jinompa po cae pin nacuathe copiya pata

tana nejutebixae?” jei barapomonae. <sup>11</sup> Bapoxonae barapomonae juma xatabatsi paparuwan, po paparuwan inyapana. Yawano barapomonae baraichichi: “Abũ cataunxuae paeware beya poxonae yacui opi ducuiya werawera-caena xua cataunxuae jujutebaponaeinchi pomonae irũ Cristo pejume cowũntsiwi. Barapomonae jujutebaponaeinchi pecueicueijeixae Cristo pejume diwesi, icha xua poxonae paichim”, jei Nacom.

<sup>12</sup> Poxonae Cordero tsitsinaxuba pecatsatabiwa xua seis po cuiyobetha, bapoxonae tan xua bichocono ira jijiyata. Xometo bichocono tsaebia tsanaya icha paparuwa ichi, pocotsi paparuwa bichocono tsaebia. Jomocoichato bichocono tsobia tsanaya icha pejana ichi. <sup>13</sup> Opitei xua peitabocotha dubena othopeica po irathe tsique, icha be joibo ichi xua jubaba higuera nae xua pethei othothopeica. <sup>14</sup> Peitaboco aichurucuae icha be poxonae ichũn ichi xua poxonae mata quiyontaba papera. Mataũtano demxuwana, petunaettonno equeicha ichawa bepoinya poxonae ira jijiyata. <sup>15</sup> Bapoxonae daxita pomonae jiwi itorobiya pia pepa peewatsiwichi tatsi xua barapo cae pin nacuathe, barapomonae nantsiyaba. Irũ pomonae pentacaponaeawi irũ pomonae copei pexeinaewi, irũ pomonae soldadomonae pia pentacaponaeawi xua pomonae jiwi peamanayabeibi jiwi daxita barapomonae nantsiyaba. Daxitarũ pomonae pebusi cui tatayebebiwichi irũ pomonae xua saya penata exanaewi piawan nantsiyabarũ. Ichamonae barapomonae jiwana ibo mũthũnthã nantsiyaba. Ichamonae barapomonae jiwana nantsiyaba po ibotonthã xua saya bobena xua demxuwana itapatororon tsica. <sup>16</sup> Barapomonae demxuwana beya yawa iboton beya jeye: “Pana mataperababare xua pata werapaewa tsane xua daxota pon xua eca pia pexeinya pecaethopebiwatha jopa pata tana netaewa tsane, yawa xua barapo Cordero

pecuiyainwa xua pata neperaxa jübiya exanaeyainwa xua abe pata exanaexae. <sup>17</sup> Tsipei barapo matacabi patopa po mataqueitha daxita jiwi peraxa jübebinchi. Dapon aibi pon panepa barapo mataqueitha”, jei pomonae nantsiyaba.

## 7

*Meje yabara po diwesi xua Nacom itapa tina Israel pia pexui tatsi pia pemomoxi susato jiwana piwi tatsi xua peyaitaenexa*

<sup>1</sup> Bapoxonae cuatro poyobe tan matatsunpiwi xua iratha umena. Ichün uncuacha ichaxota pocotsiwa xometo weecoina, ichün uncuacha ichaxota pocotsiwa xometo bejopiya, ichünbe epatautiya uncuabe. Barapo matatsunpiwi jopa copatsiyo xua joibo pejojondenaewa barapo iratha dena, yawa xua pin mar menein dena, yawano naeintha denano. <sup>2</sup> Barichi ichün tan ichün matatsunpin pon pocotsiwa wetsina pona ichaxota pocotsiwa xometo weecoina. Barapo matatsunpin capona Nacom piawa xua pocotsiwa peyaputaewa piawaxae, pocotsiwa pecatinaewa pon Nacom peyapusu itorobi coyenewa pexinaein. Barapo matatsunpin jume daunweya wawai icha matatsunpiwi beya xua cuatro poyobe, po cuatro poyobe pia peyapusu itorobi coyenewa xeina xua itacupatsi xua abe exanaena pin mene mar mentha yawa iratha. <sup>3</sup> Barapo matatsunpin jeye: “Jopa abe paexanaeinde iratha yawa pin mene mar mentha, paeware abu beya poxonae jiwi paitapa tinaein Nacom pia pejume cowuntsiwichi, pon pata Nacom”, jei barapo matatsunpin.

<sup>4</sup> Jume tan barapomonae yabara, xua ichün jeye: “Ciento cuarenta y cuatro po jiwimonaebe paitapa tinan xua Israel pia pemomoxi susatomonae jiwana tatsi”, jei. <sup>5</sup> Barapo Israel pon icha wun Jacob. Bapon xeina doce po pexantobe tatsi pomonae caena bayatha werapa. Israel

pia pexanton tatsi pia pemomoxi susato jiwi tatsi xeina. Pon Judá, barapon pia pemomoxi susato jiwanapiwi tatsi Nacom itapa tina saya doce mil pomonae matabuxumonaebe. Pon Rubén, barapon pia pemomoxi susato jiwanapiwi tatsi Nacom itapa tina saya doce mil pomonae matabuxumonaebe. Pon Gad, barapon pia pemomoxi susato jiwanapiwi tatsi Nacom itapa tina saya doce mil pomonae matabuxumonaebe. <sup>6</sup> Pon Aser, barapon pia pemomoxi susato jiwanapiwi tatsi Nacom itapa tina saya doce mil pomonae matabuxumonaebe. Pon Neftalí, barapon pia pemomoxi susato jiwanapiwi tatsi Nacom itapa tina saya doce mil pomonae matabuxumonaebe. Pon Manasés, barapon pia pemomoxi susato jiwanapiwi tatsi Nacom itapa tina saya doce mil pomonae matabuxumonaebe. <sup>7</sup> Pon Simeón, barapon pia pemomoxi susato jiwanapiwi tatsi Nacom itapa tina saya doce mil pomonae matabuxumonaebe. Pon Leví, barapon pia pemomoxi susato jiwanapiwi tatsi Nacom itapa tina saya doce mil pomonae matabuxumonaebe. Pon Isacar, barapon pia pemomoxi susato jiwanapiwi tatsi Nacom itapa tina saya doce mil pomonae matabuxumonaebe. <sup>8</sup> Pon Zabulón, barapon pia pemomoxi susato jiwanapiwi tatsi Nacom itapa tina saya doce mil pomonae matabuxumonaebe. Pon José, barapon pia pemomoxi susato jiwanapiwi tatsi Nacom itapa tina saya doce mil pomonae matabuxumonaebe. Pon Benjamín, barapon pia pemomoxi susato jiwanapiwi tatsi Nacom itapa tina saya doce mil pomonae matabuxumonaebe.

*Meje yabara po diwesi xua pomonae juma xatabatsi pe-mainya paparuwan*

<sup>9</sup> Вapoxonae equeicha tan ichamonae pomonae bichocono jiwi ayei. Daxita nacuanpiwi jiwanamonae, yawano daxita carepaya tsicamonaexi jiwanamonae,

yawano daxita carepaya icha jumexitha pepaebiwi jiwanamonaē, yawano daxita carepaya tomaran jiwanamonaē. Daxita barapomonaē umena ichaxota imoxoyo Nacom pia pexeinya peecaethopeibiwa, yawa xua Cordero peitabaratha tatsi. Barapomonaē bichocono pin bicheito xua ichamonaē jopa itacupaetsi peununaewa. Daxita barapomonaē juma xatabatsi pemainya paparuwan. Yawano barapomonaē pecobetha cajjinca xua be coichaxu axu. <sup>10</sup> Daxita barapomonaē jume daunweya jeye:

“¡Wanacom pon xua eca pia pexeinya peecaethopeibiwatha yawano Cordero pon uncuā, naca capanepa xua jopa waatenewa tsane xua abe waexanaexae!” jei barapomonaē.

<sup>11</sup> Barapo matatsunpiwi matawacaicha yatoxoroto umena xua pitiri jiwi matawacaicha yatoxoroto umeinchi. Yawa pitiri jiwi matawacaicha yatoxoroto umena xua xuan cuatro poyobe xua xuan asu matawacaicha yatoxoroto umeinchi. Yawano cuatro poyobe xua xuan asu matawacaicha yatoxoroto umena xua Nacom pia pexeinya peecaethopeibiwa matawacaicha yatoxoyoroto umeinchi. Bapoxonaē barapo matatsunpiwi irabe taeumendeca barapo pexeinya peecaethopeibiwa peitabaratha. Yawano Nacom wunaē jaintatsi. <sup>12</sup> Barapo matatsunpiwi jeye:

“¡Barabu Nacom juntu coyene weiweina exaneibatsi pocotsiwa xua beta waexanaewa!  
¡Bara ichi tsane!

¡Barabu daxita jiwi wunaē jainteibina Nacom!  
¡Matautano barabu Nacom xeineibina pia peyaputae coyenewa!

¡Matautano barabu jiwi jei tsaibi:

‘Nacom maisa pajuntu coyene weiweinan

xua amanaya pata tana neyawenaemxae',  
 jei tsaibi jiwi!

¡Barabũ daxita jiwi cayabara  
 barũ cui itura jineibina!

¡Matautano barabũ xeineibiname jinya neayapusũ  
 itorobi coyenewa, xuano xua xeinaename jinya  
 neayapusũwa xua daunweya neexanae coyene!

¡Baxuan barabũ ataya xeinaename!

¡Je bara ichi tsane!” jei barapo matatsunpiwi.

<sup>13</sup> Barapo pitiri jiwi jiwana caein neyainyaba, nejei:  
 “¿Jintam barũre pomonae pemainya paparuwa nama  
 xataba? ¿Eta werena pona?” nejei pitirin. <sup>14</sup> Jume notan,  
 janje: “¡Pon pentacaponae, apara xam yaputaneme  
 jame!” jan. Barapoxonae nejei: “Barapomonae apara  
 pomonae werena pona ichaxota poxonae po mataque-  
 itha jiwi bichocono atene exaneibatsi. Barapomonae  
 abe pia peexanae coyenewan tatsi Nacom tajũntemaina,  
 tsipei barapomonae jume cowũntatsi xua pon tsitũpa  
 barapomonae, pon ‘Cordero’ baraichichi. Barapomonae  
 jũntũ coyene wũnae exanatsi Nacom. Yawa pemainya  
 paparuwa jume xatabatsi”, nejei pitirin.

<sup>15</sup> Equeicha nejei pitirin:

“Daxota barapomonae umena ichaxota imoxoyo  
 Nacom pia pexeinya peecaethopeibiwa.  
 Barapomonae tanacuita dubenanaebiya Nacom  
 mataqueitha, yawa merawithano Nacom pia  
 pin botha tatsi xua pia nacuatheicha tatsi.  
 Pon xua eca pia pexeinya  
 peecaethopeiwiwatha bapon eenequeibina  
 barapomonae, tsipei barũ popona.

<sup>16</sup> Bapoxonae barapomonae jopa piyainyo,  
 yawa jopa pia meratsino,  
 yawa jopa tsaquiwichi xometotha

xua bichocono jainchi.

<sup>17</sup> Barapo coyene jopa abe exanaeyo  
 barapomonaetha, tsipei Cordero Nacom  
 Pexanto tatsi, pon uncua ichaxota  
 imoxoyo Nacom pia pexeinya  
 peecaethopeibiwatha, bapon yawena  
 xua barapomonaeyawenatsi.  
 Barapon Cordero barapomonaey beta yapu  
 eenaeinchi, icha be poxonaey  
 pon ovejan peewatsin ichi  
 poxonaey pia ovejan matacapona beta  
 ichaxota penaton mene, po meran  
 mene xeica, xua peasawa tsane.  
 Bapoxonaey barapomonaey Nacom itacuere  
 mene tsewa exanaena xua pewecoyeixaey”,  
 nejey pitirin.

## 8

*Meje yabara po diwesi xua siete po pecatsatabiwa xua tabu  
 ducua*

<sup>1</sup> Poxonaey Cordero tsitsinaxuba siete po cuiyobetha  
 xua barapo diboro catsataba, bapoxonaey peitaboco moya  
 ducua saya be ainya dapaeyobe. <sup>2</sup> Bapoxonaey tan si-  
 ete poyobe matatsunpiwi, pomonaey xua umena Na-  
 com peitabaratha tatsi. Barapo matatsunpiwi daxita  
 barompaya catsibatsi siete xoyobe xua pocotsiwan pecaobi-  
 wan, po pecaobiwan pewun trompeta. <sup>3</sup> Bapoxonaey  
 pirapaeyo patopa ichun matatsunpin. Barapo matat-  
 sunpin capatopa xua be coroto xua pocotsiwa oro nain  
 coroto. Barapo oro nain corotoha boca petuxuei tsapato  
 xua petautsinexa Nacom nexa. Barapoxonaey barapo  
 matatsunpin yutabotsiya tautabota xua ichaxota pocot-  
 siwa be pecaethopaewa, bichocono tuxuei tsurucuae.

Barapo matatsunpin uncua ichaxota pocotsiwa be pexaethopaewa ichaxota tauteiba petuxueiwan, po petuxueiwan xua tuxusi exaneiba Nacom nexa. Bapoxonae barapo matatsunpin catatsi nawita xua petuxueiwan. Pomonae Nacom peantobewixaetsi poxonae tsipaebeiba Nacom, barapo jumein yawa muxuna jujuinya Nacom beicha barapo petuxueiwa xua poxonae tauta. Baraxua xua be pexaethopaewa ichaxota xua tauteiba petuxueiwan, baxua Nacom pia pexeinya peecaethopaewa itabaratha tatsi uncua. <sup>4</sup> Barapo petuxuei tuxusi mureiwa matatsunpin pia maxa wetajujuinyatsi Nacom peitabara beya yawa athabe muxuna jujuinya pejume, po jume xua jiwi poxonae tsipaeba Nacom. <sup>5</sup> Bapoxonae barapo matatsunpin barapo oro nain coroto pita, yawa barapo corototha bichocono wunca exana iso itere, po itereton xua taxua barapo petuxusi exanathopeibiwatha. Bapoxonae daxita baxua po irathe xuba, bapoxonae yamuxa busi, yawa jerajerei, yawa ira jijiyatano po cae pin nacuatha tsique.

*Meje yabara po diwesi xua trompeta xua pecaobiwan*

<sup>6</sup> Barapo siete poyobe matatsunpiwi daxita barompaya nacui wunaeta pia trompetan xua peobinexa.

<sup>7</sup> Pon xua copiya, bapon oba pia trompeta. Bapoxonae othopeica be ibotixi, pocotsiwa xua benata ichaxota po eman bichocono aque. Yawano muxuna iso itere othopeica. Yawa muxuna othopeica pocotsiwa be pejanan. Daxita baxuan matatsunpin iratha bebaichica. Bapoxonae ichaxota acoibi po iranbe tsitsiniya, cae iran jiwana wetataxua tsiniya ainya irabe jopa daichiyo. Matautano taxua ichaxota acoibi po unube tsitsiniya, cae unun jiwana wetataxua tsiniya ainya unube jopa daichiyo. Matautano naepanaewan ichaxota acoibi po wexuabe tsitsiniya, cae wexua jiwana wetataxua tsiniya ainya wexuabe jopa daichiyo.



<sup>8</sup> Bapoxonae equeicha ichən matatsunpin oba pia trompeta. Bapoxonae pocotsiwa be demxuwa taxuapona. Barapo demxuwa xubatsi pin mar mentha, yawano pin mene mar pejana mene tsanaya. Dos po pin mar menebe jopa daichiyo. <sup>9</sup> Po pin mar mentha pejana tsanaya baxota duwei werapa, po duwei jinompa baxota. Matautano jeran fobaba pocotsi naein bichocono pin naein.

<sup>10</sup> Bapoxonae equeicha icha matatsunpin xua tres poyobetha, bapon pia trompeta oba. Bapoxonae opiteito, poto pinto jopeica itaboco wetsica po irathe tsique, yawa taxuayecapona icha banaxuto ichi. Barapo pin opiteito jopeica mentha xua yawa jopeica ichaxota ira buxupana mene mene natsibotarucua. Saya xua daxita mentha aibi. Saya poxonae tres po menebe bara cae mentha jopeica, yawa jopeica xua cae ira buxupana mentha. Icha ira buxupana menthabe jopa daichiyo. <sup>11</sup> Barapo pin opiteito wun dutatsi “Amargura”, jei, po jume xua “Atsu”, jei. Daxota poxonae jopeica barapo mentha mene atsu tsanaya. Pinmonae jiwi werapa poxoru apa barapo peatsu mera.

<sup>12</sup> Bapoxonae equeicha icha matatsunpin xua cuatro poyobetha pia trompeta oba. Bapoxonae jiwana muxunene weabe exana xometo. Ainya muxunenepabe jopa daichiyo. Yawa jiwana muxunene weabe exana jomocoichato. Ainya muxunenepabe jopa daichiyo. Yawa jiwana weabe exana opitei. Icha opitei nacopaba. Poxonae acoibi po opiteibe dudubena tsiniya, bapoxonae cae opiteito jiwana weabe eexana tsiniya. Yawa ainya opiteitobe jopa abe eexana tsiniyaeyo. Po opitei abe exanatsi jopa xanapanaya pentha tsurubenaeyo. Yawano jomocoichato muxunenepa, po muxunenepa abe exanatsi, jopa pentha tsurucuaeyo. Yawa xometo muxunenepa, po muxunenepa abe exanatsi, barapo muxunenepa jopa

xanepanaya pentha tsurucuaeyo. Daxota mataqueitha tsiwiyo quiriquirica, yawa merawi bichocono nama.

<sup>13</sup> Bapoxonae pirapaeyo tan matatsunpin pon be cuiyausi xua juinya pupuna ducuaenaebiya itabocotha. Bapon jume daunweya jeye: “¡Pai jiwi tsobenae xua barapo jiwi abe exanaeinchi pomonae jinompa po iratha deque xua poxonae jume taena xua poxonae matatsunpiwi obina trompetan, tsipei acoibi poyobe matatsunpiwi cataunxuae jopa obiyobe anoxuae!” jei bapon, pon be cuiyausi.

## 9

<sup>1</sup> Bapoxonae equeicha icha matatsunpin xua cinco poyobetha oba pia trompeta. Bapoxonae tan pon xua be opiteito jopeica iratha bayatha, xua peitaboco wejopeica. Bapon catatsi po coyenetha itacupatsi xua pecoibo saranaxubiwa tsane barapo pin mũthũ deca xua ira bereca. <sup>2</sup> Bapoxonae bapon coibo saranaxuba. Barapo mũthũ coiboto tsina be pin tsũxũ jujuina, po tsũxũ icha pabi coicha tsũxũ ichi poxonae pin pabi. Barapo tsũxũ po irathe naquitaba exana yawa xometo naquitaba exanano. <sup>3</sup> Barapo tsũxũ weya pupuna sure, xua daxita iranthe pupuna. Barapo sure catatsi, pocotsi coyene icha pũto ichi xua poxonae naca cawata. <sup>4</sup> Barapo sure itorobatsi xua jopa abe peexanaewa tsane naepanaewatha xua wexotha xuwa yawa xua tsica naexi. Yawano xua jopa abe peexanaewa tsane naeintha. Saya jame itorobatsi xua abe peexanaewa tsane jiwitha pomonae Nacom jopa itapa tinaeyo. <sup>5</sup> Ichitha jopa copatsiyo xua jiwi pejutebiwatsi tsainchi. Saya jame copata xua saya jiwi atene exanaeinchi beya poxonae cinco po xometiyobe tsane. Barapo peatenewa bichocono atene icha be poxonae ichi xua poxonae ichũn cawatatsi pũto.

<sup>6</sup> Barapo mataqueitha, po mataqueitha jiwi bichocono atene tsane, cuinaya bewerapabenaena ichitha jopa cuinaya werapabenaena tsane.

<sup>7</sup> Sure be cawayumonaein nacui wunaeta xua penabinexa. Barapo suremonaein mataina pocotsiwan be tepan be pocotsiwan penainton xuan pewan oro nain. Matauta peitabaran be jiwi itabaran. <sup>8</sup> Pentanan bichocono antanapipiya be yabuxi, pewanon awanoyei be neuthu wanon. <sup>9</sup> Pia pepon tsebocon dubena be penain xuan baxota penayaewatsinexa, po penain pewan hierro nain matawan. Pecuarafein busin be cawayu busin poxona cawayu cacuinaejjinca ainya naein xua cawayu pecapona naexi xua penabiwa tsane. <sup>10</sup> Pebosoton be puton bosoton xua e dubena. Pia pebosotontha itacupatsi xua abe peexanaewa jiwitha xua beya poxona cinco po xometobe. <sup>11</sup> Barapo suremonaein xeina pia pentacaponaein, po pentacaponaein peewatsin barapo pia pin muthu, po muthu ira bemuthu taerucuaeca. Barapo matatsunpin pon suremonaein pia pentacaponaein tatsi hebreo jume wuntha “Abadón”, jei. Seicaya griego jume wuntha “Apolión”, jei. Barapo jume wuntha jeye: “Pon Pecaewitaxubin daxita”, jei.

<sup>12</sup> Baxua weta xua copiya abe peexanaewan, ichitha awiya seica ainya peabe coyenewabe.

<sup>13</sup> Bapoxona equeicha icha matatsunpin xua seis poyobetha oba pia trompeta. Bapoxona jume tan xua cueicueije cuatros po pentetobe weya. Barapo cuatro po pentetobe umena pemuxuburutha xua be pexaethopaewa xua ichaxota tauteiba petuxueiwa xua tuxusi exaneiba Nacom nexa. Baraxua xua be pexaethopaewa daxita matapaeicha juma catsababa oro nain. Baraxua Nacom pia pexeinya pecaethopeibiwa itabaratha tatsi uncua. <sup>14</sup> Barapo matatsunpin xua pon seis poyobetha

xua pon pia trompeta xeina barapo jumetha tsipaebatsi barapon. Barapo matatsunpin jeichichi: “Barapo cuatro poyobe matatsunpiwi pomonae maxu cãbebatsi maxu isacapende xua pomonae umena ichaxota po mene pin mene, po mene pewun Eufrates”, jei. <sup>15</sup> Bapoxonae barapo cuatro poyobe sorobabatsi, xua jiwi pejutebiwa tsainchi. Icha bicheito jutebatsi. Dos po bicheitobe jopa jutebichi. Barapo cuatro poyobe bayatha cui wnaetatsi xua po horathe nexa, yawa xua po matabithe nexa yawa xua po xometothe nexa yawa po weithe nexa xua poxonae pesorobabiwatsi tsainchi. <sup>16</sup> Jume tan xua pia soldadomonae yabara paeba xua pomonae bichocono ayei xainto bicheiton, jeye: “Bapon doscientos millones xeina po soldadomonae cawayutha pona”, jei.

<sup>17</sup> Xua xuan tan cawayumonaein iche: Pomonae cawayutha eneica pentacaritha cajijinca penain bocoton, petsobiwanno, yawa pesujeiwanno, yawa pedaedaenawanno. Barapo cawayumonaein peitabaran be neuthu itabaran. Barapo cawayumonaein pecoiboton tsina iso itereton tajujuinatsi xua tsuxu tsobia, yawano icha tsuxuno xua coicha sjei. Yawano icha coicha po tsuxu coicha daena. <sup>18</sup> Pin bicheitomonae werapa tsipei barapo cawayumonaein pecoiboton tsina tajujuinatsi iso itere, petsuxuno xua sjei, yawa icha tsuxu po coicha bichocono coicha daena. Dos po bicheito cuntiyobe jopa daichiyo. <sup>19</sup> Barapo cawayumonaein pecoiboton tajujuinatsi pia peayapuswan tatsi yawano pebosoton tsinano. Barapo cawayumonaein bosoton be jomon matanaein. Barapo jomo matanaeintha jiwi abe exainchi.

<sup>20</sup> Ichitha ichamonae pomonae jopa werapaeyo barapo pewerapaewantha, barapomonae jopa pentsiyo abe pia peexanae coyenewan. Matautano jopa barapentsiyo xua antobeya wnae pejainchiwa caurimonaetha. Matautano

jopa barapentsiyo po nacom oro nainto nacom, yawa plata nainto nacom, yawa bronze nainto nacom. Yawano wɔnae jainta ibo nacom. Yawano wɔnae jainta nae nacom. Barapo nacomɔnmonae jopa itacɔpaetsi xua penecotsiwa. Yawa jopa itacɔpaetsi xua pejume taewa. Yawa jopa itacɔpaetsi xua peponaewa. <sup>21</sup> Matautano jopa barapentsiyo xua ichamonae pejutebiwatsi. Yawano matauta jopa barapentsiyo po coyene xua mara peexanaewa pia coyenewan tatsi. Yawano jopa barapentsiyo xua penata siwa xeinaewa yabuxitha. Matautano jopa barapentsiyo pecaibi coyenewan.

## 10

*Meje yabara po diwesi xua matatsunpin capona tsica dibiriyo*

<sup>1</sup> Xan ponxaein Juan, bapoxonae equeicha tan icha matatsunpin pon bichocono peayapusɔn xua peitaboco wetsica pona po irathe tsique. Barapo matatsunpin tsaquinaebowa muxuna dederaquiya duneica. Yawano matatsun uncuicatsi coinwawa. Peitabara bichocono itabara pentha icha xometo ichi poxonae pentha. Yawa pesitobe be isoto coicha xua bichocono coicha tsobia.

<sup>2</sup> Tsica dibiriyo pecobetha capona xua itutaduta. Po sito xua pecoxa weya pin mar mentha uncuu, yawa po sito petsocona werena iratha uncuu. <sup>3</sup> Bapoxonae bapon jume daunweya wawai be poxonae neuthɔ jume daunweya fiba. Poxonae bapon wawai, bapoxonae jume tan xua be jurujurei yamɔxɔ siete po jumeyobe xua paeba. <sup>4</sup> Poxonae baxua najume weta xua be jurujurei yamɔxɔ siete po jumeyobe xua paeba, pontaban xua tatinaenexa xua baxua paeba. Ichitha jume tan pon peitaboco wenetsipae-bica. Nejei: “Moya yawɔn xeinare yawa jopa tinaeinde

xua barapo siete jumeyobe xua be jurujurei yamꞑꞑ”, nejei.

<sup>5</sup> Bapoxonae barapo matatsunpin pon xua po sito pecoxa weya uncua pin mar mentha yawa xua po sito petsocona weya uncua iratha, bapon namaxꞑ yoicha peitaboco beicha po maxꞑ xua pecoxa weya. <sup>6</sup> Matatsunpin pon namaxꞑ yoicha peitaboco beicha po maxꞑ pecoxa weya, bapon jeye: “Nacom, pon ataya popona, bapon itaboco forota. Bapon irano forota, pin mar meneno forota. Daxita ichawan muxuna forotano, pocotsiwa itabocotha dubena yawa pocotsiwa irathano xeina yawa pocotsiwa pin mar menthano jinompa. Barapon peitabaratha tatsi uncuan. Bara xaniwaicha paeban bapon peitabaratha tatsi. Yabara tsiwꞑnae muxu dutan: ‘Equeicha daxua aibi xua peewatsiwa’, jan”, jei matatsunpin. <sup>7</sup> Equeicha barapo matatsunpin jeye: “Poxonae matakabi patopaena po mataqueitha icha matatsunpin obina pia trompeta xua siete poyobetha, bapoxonae Nacom nacui jꞑtsina xua daxita wetsina. Nacom wetsina xuan pocotsiwan caena bayatha Nacom yabara tsiwꞑnae muxu duta piamonae tatsitha, pomonae Nacom peitorobi jume pepaebiwi. Barapocotsiwan xua Nacom yabara tsiwꞑnae muxu duta, baxuan jiwi jopa yaputaeyo poxoru jopa Nacom yatsicaewa tsita itꞑtsiyo jiwitha”, jei barapo matatsunpin.

<sup>8</sup> Barapo jume pon xua itaboco wenetsipaebica, bapon equeicha netsipaeba, nejei: “Ponare yawa pire barapo dibiriyo xua po dibiriyo naitꞑtarucua. Barapo dibiriyo pire, po dibiriyo barapo matatsunpin comauncua. Barapo matatsunpin pon po sito pecoxa weya uncua pin mar mentha, yawa uncua iratha po sito petsocona weya”, nejei. <sup>9</sup> Bapoxonae matatsunpin beya ponan yawa wꞑsan barapo dibiriyo, janje: “Necare barapo dibiriyo”, jan.

Nejume nota, jeye: “Moya pire, moya yawa xaema barapo dibiriyo. Poxonae barapo dibiriyo xaename necoibotha catsijain xeicaena be banto tsane. Ichitha necotsorotha atsu tsane”, nejei matatsunpin.

<sup>10</sup> Bapoxonae barapo matatsunpin wecobe pitan barapo dibiriyo yawa xan. Poxonae xan netsicoibo xeica be banto ichitha tacotsorotha bichocono atsu tsanaya.

<sup>11</sup> Bapoxonae netsipaeba, nejei: “Xam bewa equeicha yabara tsiwænae muxu dutsiya paebiname po coyene bayatha Nacom yabara paeba jiwi, xua ainya nacuanpiwi, yawa pomonae barompaya pijume pepaebiwi, yawano pomonae jiwi itorobiya pia pepa peewatsiwichi”, jei xua pon netsipaeba.

## 11

*Meje yabara po diwesi xua dos ponbe, ponbe yatsicaewa Nacom pia petapaebinchibe xua petaexaebe pocotsiwa Nacom exana*

<sup>1</sup> Bapoxonae necata naeto pocotsiwa xua peepa canaæbiwa. Yawano matatsunpin nejei xua Nacom tapaebatsi: “Asiya uncuare yawano pire barapo naetiyo. Bapoxonae Nacom pin pia bo beya ponare, yawa bara po bo epa canaæbare. Yawano epa canaæbare xua be pexaethopaewa ichaxota tauteiba xua petuxueiwa xua tuxusi exaneiba Nacom nexa. Yawano ununare pomonae baxota Nacom wænae jaintatsi, pomonae yatsicaewa Nacom peantobewichi. <sup>2</sup> Ichitha jopa pana epa canaæbinde, po pana pesato beya boca ichaxota Nacom pia pepa pin pia bo tatsi uncua. Tsipei barapo pana ichamonae catatsi pomonae penanapaincha jinompaewi xua icha nacuan werena peponaewi, pomonae Nacom jopa pejume cowæntsiwichi. Barapomonae abe exanaena Nacom pia pexeinya tomara tatsi po tomara xua barapo

cae pin nacuathe xua beya cuarenta y dos po xometobe yacui nacui wetsiya jopaena. <sup>3</sup> Xan itorobin dos poyobe, ponbe xua inta yatsicaewa paebinabe xua petaexaebe xua pocotsiwa exanan. Baponbe inta yabara tsiwunaē muxu dutsiya paebinabe jiwitha xua beya un mil doscientos sesenta po maticabinbētha tsane. Baponbe jume xatatsinbe pocotsi paparuwa xua axun, xua jiwi nama xatabeiba poxoru wecoyei”, nejei matatsunpin xua Nacom tapaebatsi.

<sup>4</sup> Barapo pebinbe ponbe xua inta paebabe, baponbe ichawa yabara caunutatsibe. Caena bayatha Nacom pia peitorobi jume pepaebin, pon pewun Zacarias yabara tina olivo naebe, yawa yabara tina ainyawabe pocotsiwa petabuyubeibiwa peicoichan. Barapocotsiwanbe caunuta xua ponbe inta paebabe. Barapo ainya olivo naebe yawa barapo ainyawabe xua peicoichan petabuyubeibiwa umena pentacaponaein peitabaratha tatsi, pon po cae pin nacuepiwi pia Pecanamataxeinaeinchi tatsi. <sup>5</sup> Icha ichamonaē ichichipa xua baponbe abe peexanaewatsibe baponbe itacupatsibe xua weraweraca peexanaewabe barapomonaē peicoiboto tsina icha be pocotsi coyeneya metha ichipabe xua poxonaē daxita weraweraca exanabe poxonaē be isoto tajuinatsibe. Barapo isototha baponbe omeicha tautabe pia peitafaetabiwichi jiwitha. Barichi werapaena pomonaē ichichipa xua baponbe abe peexanaewatsibe. <sup>6</sup> Baraponbe xeinabe pia peitorobi coyenewa xua itacupatsibe peitaboco acatsiwa tsanebe xua jopa ema peruneicaewa tsane. Baxua itacupatsibe xua exanabe poxonaē baponbe po maticabitha cataunxuae Nacom tapaebi ducuaenaebiyatsibe. Matauta baponbe pia peitorobi coyene xeinabe xua meratha equeicha pejana tsanaya exanabe. Matautano baponbe itacupatsibe xua exanabe poxi xua abe exana iratha. Ainya



coyenein baponbe exanabe xua xuan be pocotsi coyeneya ichichipabe xua peexanaewabe.

<sup>7</sup> Poxonae baponbe nacui wetsinabe xua tapaeba ducua-naebiyabe xua Nacom tapaeba ducua-naebiyatsibe, bapoxonae juinaena po muthu pin muthu tsina pon ayei pon bichocono abe peexanaein. Baraponbe be xua butside natsicotainchi yawa amanayabinchibe xua tupa peexanaenexatsibe. <sup>8</sup> Petupaeinbe saya pesatotha bocaenabe tomara namtotha, po pepa tomaratha ichaxota matha naetotha tupa exanadutatsi pon jiwu Pecanamataxeinaein xua baponbe pia Pecanamataxeinaeinchibe tatsi. Jiwu barapo pepa tomara yabara jeichiya jeye: “Barapo Jerusalén tomarapiwu apara be ‘Sodoma tomarapiwu’, jei, yawa barichi be ‘Egipto nacuapiwu’, jei”, jei jiwu. Jiwu barapo Jerusalén tomarapiwu yabara caunutsiya paeba tsipei caena bayatha Sodoma tomarapiwu abe peexanaewimonae. Yawa iru Egipto nacuamonaepiwu abe peexanaewimonae, icha barapo pepa tomaramonae ichi xua Jerusalén tomara xua abe exana. <sup>9</sup> Daxita pomonae tomarapiwu jiwana, iruno tsicamonaeyo jiwana, iruno pomonae barompaya icha jumexitha pecueicueije jiwu jiwana, iruno daxita pomonae nacuanpiwu jiwana, daxita barapo jiwimonae taeumenaena barapo petupaeinbe. Baponbe petupaeinbe bocaenabe acoibi po matabibibe yawa xua equeicha bara caetono. Daxita barapomonae pomonae taeumena, jopa copatsi tsane xua ichamonae bara petupaeinbe pemuthuthu xubiwa tsainchibe. <sup>10</sup> Pomonae xua jinompaena po irathe junte-miya jinompaena xua petupaexaebe baponbe. Daxota daxita barapomonae juntu coyene weiweinaena, yawano daxota barapomonae nantiya nacatsibina pocotsiwan amanaya penacatsibiwan. Barapomonae baxua exanaena tsipei ajumeitafaetabi tsane pocotsiwa paebabe Nacom

nexa, ponbe Nacom peitorobi jume pepaebinbe.

<sup>11</sup> Ichitha poxonae yapu caewinaba acoibi po matacabibe yawa xua equeicha bara caeto bocaenabe, bapoxonae equeicha Nacom asu exanaenabe. Bapoxonae asiya uncuaenabe. Daxita pomonae xua poxonae baponbe taeinchibe, bichocono junuwina. <sup>12</sup> Bapoxonae baponbe jume taenabe xua pon itaboco wetsica jume daunweya baraunchi tsainchibe, jei tsainchibe: “¡Bara wepajuinamebe!” jei tsainchibe. Bapoxonae baponbe itaboco beicha juinyaenabe tsaquinaebowatha yawa pu taeume-naeinchibe pia peaitafaetabi jiwichi. <sup>13</sup> Barapoxonae caena ira jijiyatsina bichocono. Ichaxota diez po bonbe uumena tsiniya cae bon jiwana othopa jujuincaena, nueve po bonbe tsiniya jopa daichi tsane. Siete mil po pebiwi matabuxumonaebe werapaena ira pejijiyatsixae tsane. Pomonae jopa werapae tsane bichocono junuwina daxota Nacom wunaenae jainchinchinchi, po Nacom itaboco beequiya.

<sup>14</sup> Bayatha nacui weta xua dos xoyobe xua daxita jiwi atene tsane bichocono. Ichitha imoxoyo equeicha methaunxuae tsane ichawa pocotsiwa acoibi po cuiyobe nexa pocotsiwa xua jiwi bichocono atene tsane.

*Meje yabara po diwesi poxonae xua matatsunpin xua pon siete poyobetha oba pia trompeta*

<sup>15</sup> Barapo matatsunpin xua pon siete poyobetha pia trompeta oba. Bapoxonae pejume itaboco wetsica jume daunweya jeye:

“Po coyene xua jiwi itorobiya peewatsiwatsi barapo cae pin nacuathe, anoxuae barapo peitorobi coyenewa Nacom pon Wanacanamataxeinaein piawa iruno Mesías pon Nacom pia peitorobarecaein, bapon piawa tatsi. Baponbe daxita jiwi itorobiya ewatsinchi barapo cae pin nacuathe xua ataya tsane”,

jei pomonae xua itabocotha jume  
daunweya wawai.

<sup>16</sup> Bapoxonae tan barapo pitiri jiwi, po pitiri jiwi veinticuatro poyobe. Barapo pitiri jiwi ena pia pexeinya peenaethopeibiwatha, Nacom peitabaratha tatsi. Barapo pitiri jiwi pentabocototha irabe taeumendeca xua Nacom wɔnae pejainchinexatsi. <sup>17</sup> Barapo pitiri jiwi jeye Nacomtha:

“Xam pata Nacom, ponxaem jiwi  
Necanamataxeinaem pajuntɔ coyene  
weiweinan xua pocotsiwa painta neexanaexae.  
Xam barapo pata Nacom, pon  
neayapusɔ itorobi coyenewantha neexanaein.  
Xam pon anoxuae ataya poponeibiname yawa  
xua caena bayatha ataya poponeibameno,  
yawano xua bexa tsane ataya poponeibinameno.  
Tsipei anoxuae po mataqueithe nama tamropata  
pitabame jinya neayapusɔ itorobi coyenewa  
xua tsita itutame xua poxonae daxita  
carepaya nacuanpiwi itorobiname.

<sup>18</sup> Daxita nacuanpiwi cacaseba, ichitha  
anoxuae matabi patopa, po mataqueitha  
bichocono anaya atene exanaename  
barapomonae abe peexanaexae.  
Yawano barapo mataqueitha daxita jiwi  
yabara paebiname xua  
penatsicuentisiwa pomonae xua wɔnae  
peexanaewi irɔ pomonae xua abe peexanaewi.  
Daxita barapomonae bayatha werapa.  
Barapo mataqueitha irɔ pomonae xua cata  
nacuita, pomonae jinya neitorobi jume pepaebiwi,  
irɔ pomonae xua pejuntɔ coyene xanepanaewi,  
barapomonae matabɔxɔmonaebe catsibiname  
pocotsiwan xua bayatha juntana jebame

xua nematomatsiwan.  
 Barichi catsibiname pomonaetha pomonae jopa  
 judiomonae naexanaeyo pomonae bequein bara  
 ichamonae saya pecui pawimonae, matautano  
 bequein bara ichamonae peainya cui jiwimonae.  
 Ichitha xam saya bara catsita najura.  
 Matautano barapo mataqueitha daxita omeicha  
 atene exanaename pomonae abe peexanaewi  
 barapo cae pin nacuathe”,  
 jei barapo pitiri jivi.

<sup>19</sup> Bapoxonae Nacom pin pia bo tatsi nacoibo saranax-  
 uba xua itabocotha. Barapo Nacom pin pia botha  
 jivi tane pocotsiwa xua ichawa yanta xatatababota xua be  
 caji. Barapo cajatha boca Nacom petinae diwesi, pocot-  
 siwa xua Nacom yabara tsiwuna muxu duta pomonaetha  
 pomonae pia petanacuichiwichi pocotsiwa bexa Nacom  
 taexanaena xua barapomonae taexanaeinchi. Bapoxonae  
 yamuxu busi xua be jurujurei yawa jerajerei. Matau-  
 tano ira jijiyata, yawano nawita othopeica xua dederawa,  
 pocotsiwan benata poxonae po eman ichaxota bichocono  
 aque.

## 12

*Meje yabara po diwesi xua petsiriwa yawa pon pinyo, pon  
 be jomowabi, bapon pon be Joyoinya*

<sup>1</sup> Bapoxonae itabocotha naituta xua pocotsiwa bexa  
 exanaena po cae pin nacuathe tsique. Tan petsiriwa  
 powa nama xatata po paparuwa bichocono wuna, icha be  
 xometo ichi poxonae pentha. Bapowa nataxu yutuuncua  
 jomocoichatotha. Barapowa mataina tepa, po tepatha  
 doce xoyobe xeina opitei. <sup>2</sup> Bapowa yaporowa jina  
 pexuyo. Bapowa wawai tsipei atene, poxoru pexuyo  
 naexana imoxoyo. <sup>3</sup> Bapoxonae itabocotha equeicha

naituta ichawa. Tan pon pinyo, pon be jomowabi, pon be Joyoinya. Bapon pon be Joyoinya bichocono tsobia yawa siete po pentasipabe xeina yawa diez po pentetobe xeina. Daxita carepaya pentasipantha mataina tepan. <sup>4</sup>Pebosototha ira bereca bebaireca opitei. Ichaxota acoibi po opiteitonbe dudubena tsiniya cae opiteiton jiwanan abe eexana tsiniya. Barapon pon be Joyoinya ewatuncua, yabũyo ewatuncuatsi, powa xua imoxoyo exanaena pexuyo. Bapon pon be Joyoinya ichichipa xane pexuyo poxonae naexanaena. <sup>5</sup>Barapo petsiriwa tanaexanatsi pexuyo pebin wũto. Barapo pexuyo, po pexuyo poxonae wichaba itorobiya ewata pomonaе jinompa po cae pin irathe xua daxita carepaya nacuantha. Bapon daunweya beta ewata barapomonaе icha pon oveja peewatsin ichi xua poxonaе daunweya beta ewata ovejan. Bapon exana baxua naewa xua be naebarũpato. Poxonaе barapo pexuyo naexana, pitatsi yawa capoinchi Nacom pia pexinya peecaethopaewatha beicha. <sup>6</sup>Bapoxonaе barapo petsiriwa naetsiriwa ira xuepana susato tsurucuae nacua beya. Baxotiya Nacom tsiwũnaeta xua pia ira nexa yawa xua bapowa pexaewa peapatsinexatsi mil doscientos sesenta matacabibetha.

<sup>7</sup>Bapoxonaе itabocotha matatsunpiwi naba. Matatsunpin pon pewũn Miguel, bapon matacapona pia matatsunpiwi. Irũrũ pon be Joyoinya, bapon pia matatsunpiwi matacapona. Daxita barapo bicheito nantiya naba. <sup>8</sup>Ichitha pon be Joyoinya irũ pia matatsunpiwi tatsi jopa cui jũpaetsi xua Miguel peamanayabaxubiwatsi yawa xua pia matatsunpiwi tatsithano. Daxota pon be Joyoinya yawa pia matatsunpiwi tatsino jopa cui jũpaetsi xua peitabocotha pejinompaewa tsipei amanayabapentatsi. <sup>9</sup>Bapon pon be Joyoinya yawa pia matatsunpiwi tatsino itawetsicatsi po irathe tsique. Bapon pon be Joyoinya pon

caena bayatha yabara paebatsi xua jeye: “Bapon apara jomo”, jei. Bapon caurimonae pia pentacaponaein tatsi xua icha wæn pewæn Satanás. Bapon pon jiwi pemuxujainyabeibin pomonaetha pomonae jinompa daxita po cae pin irathe tsique.

<sup>10</sup> Bapoxonae itabocotha pejume jume tan pon xua jume daunweya wawai, jeye:

“Anoxuae Nacom naca capanepa exana pia peayapusæ itorobi coyenewatha xua pon be Joyoinya jopa wanacanamataxeinaenexa.

Yawano anoxuae Wanacom itorobiya ewata daxita carepaya nacuantha pomonae jinompa po cae pin irathe tsique.

Yawano anoxuae Nacom Mesías catatsi pia peayapusæ itorobi coyenewa pon Nacom pia peitorobin tatsin.

Daxita barapo coyenein anoxuae pata, tsipei pon be Joyoinya itawetsicatsi po cae pin irathe tsique.

Pon Nacom itawetsica, bapon wajiwiwimonaetha, pomonae jume cowænta Nacom, abeya muxujainyabeibatsi merawitha yawa mataqueithano xua Nacom peitætha tatsi.

<sup>11</sup> Wajiwiwimonaetha pomonae iræ xua pejume cowæntsiwi Nacom, barapomonae amanayaba bapontha pejume cowæntsixæ xua Mesías tsitæpa barapomonae.

Bapon pon Cordero, xua pon oveja pebto penæn.

Yawano amanayaba bapomonae tsipei Mesías yabara paeba dubenanaebiyatsi pocotsiwa bapon barapomonae taexainchi.

Barapomonae amanayaba, tsipei najei: ‘Bequein bapon pon be Joyoinya ichichipa naca juteba

ichitha jopa junuwichi xua werapaeinchi.  
 Awiya jume cowunta dubenanaebiyaeinchi  
 Nacom', najei.

<sup>12</sup> ¡Pajantũ coyene weiweinare pomonae  
 itabocotha painya nejinompaexae!  
 ¡Daichitha tsobenae pomonae jinompa  
 po cae pin nacuathe deque, yawano  
 xua xuan pin mar mentha jinompa,  
 tsipei Satanás bara bereca  
 bichocono anaepanaya patopareca!  
 Bapon Satanás yaputane xua jopa  
 bayatha tsaibi tsane poxonae abe  
 exaneibina po cae pin nacuathe deque", jei.

<sup>13</sup> Poxonae barapon pon be Joyoinya, pon Satanás  
 itawetsicatsi po cae pin irathe tsique, bapoxonae yabũyo  
 barainatsi, powa xua bayatha pexuyo exana pebin wũto.

<sup>14</sup> Ichitha Nacom, barapowa pecuarafe catatsi, ainya  
 cuarafebe xua cuiyausi piawan. Daxota Nacom cata xua  
 bapowa taju beya pepupunaenexa ichaxota po ira beya  
 xua Nacom bayatha tsiwũnaeta, xua pepupunaenexa pon  
 be Joyoinya weya. Barapowa pupuna barapo ira xuepana  
 susato tsurucuae nacua beya. Nacom apata bapowatha  
 pexaewa tres po weibetha yawa xua seis po xometobetha.

<sup>15</sup> Bapon pon be Joyoinya pecoiboto tsina mene sutaba  
 xua peawũbonexa xua bapowa pemonoxubinexa tsainchi  
 awũbotha. <sup>16</sup> Ichitha ira bapowa yaweinchi. Barapo ira,  
 naira yetaxuba yawa mene apaxoreca, po mene bayatha  
 sutaba bapon pon be Joyoinya. <sup>17</sup> Bapoxonae bapon pon  
 be Joyoinya bichocono anaepana bapowatha. Daxota  
 bapon nainya pona bapowa piamonae tatsi beya tatsi  
 xua penabinexa. Bapon ba xua butsi pomonae jume  
 cowunta Nacom penajume caitorobi diwesi xuano xua  
 paeba dubenanaebiya Jesús pejume diwesi. <sup>18</sup> Bapoxonae

bapon pon be Joyoinya, pon be jomowabi, pin mar mene itapa taetabotha uncua xua pewabinexa ichamonae xua peyawenaenexatsi.

## 13

*Meje yabara po diwesi pon ayei, pon be Corei, irano* xua ichun pon ayei, pon be Metsametsawa

<sup>1</sup> Bapoxonae ichun tan pon pin mar mene juina pon ayei, pon be Corei. Bapon xeina siete po pentasipabe yawa diez po pentetobe. Daxita carepaya pentetontha mataina tepan. Daxita carepaya pentasipantha tinaduba pewunxi, po wunxi xua Nacom abe yabara paebatsi. <sup>2</sup> Barapon pon be Corei be neutha xua yaquiquibia. Petaxu be tson taxu. Pecoiboto be neutha coiboto. Pon petsobian, bapon pon be Joyoinya cata pia peayapusu coyenewa, pon be Corei catatsi. Yawano muxuna catatsi pia pexeinya peecaethopaewa. Yawano catatsi pia peayapusu itorobi coyenewa. <sup>3</sup> Cae matasipatha xua pon be Corei matasipa, wan ducua be poxonae xua pocotsin tupaena. Ichitha barapo matasipa naawanxaebi exana. Daxita barapo irathe nacuanpiwi nabenaeca, tsipei naawanxaebi exana barapo matasipa. Daxota po irathe nacuanthepiwi jume cowanta bapon, pon be Corei jume cowantatsi. <sup>4</sup> Barapon pon be Joyoinya wunae jaintatsi, jiwi wunae jainta, tsipei barapon cata pia peayapusu itorobi coyenewa pontha pon be Corei. Barichi pon be Corei wunae jaintatsi, jiwi wunae jainta. Jiwi jeye: “Maisa barapon, pon be Corei ainya cui, peayapusu itorobi coyenewa pexeinaein. Dapon aibi pon pecui jupaewatsi xua bapon peamanayabixubiwatsi”, jei jiwi.

<sup>5</sup> Yawano barapon, pon be Corei copatatsi xua Nacom abe peyabara paebinexatsi. Yawano barapon, pon be Corei copatatsi xua jiwitha peitorobinexa cuarenta



y dos po xometobetha. <sup>6</sup> Bapoxonae barapon, pon be Corei bara baxua exana, xua copatatsi. Bapon Nacom abe yabara paebatsi. Matautano Nacom pin pia bo tatsi abe yabara paebatsi. Matautano Nacom piamonae tatsi, pomonae jinompa itabocotha abe yabara paebatsi. <sup>7</sup> Yawano barapon, pon be Corei copatatsi, xua bena xua beinchi pomonae Nacom pejume cowantsiwichi, beya xua poxonae barapomonae amanayabapentsinchi. Yawano barapon, pon be Corei catatsi peitorobi coyenewa, xua daxita jiwi peitorobiwatsi xua pomonae daxita carepaya tsicamonaexi peitorobiwatsi. Matautano catatsi xua daxita carepaya tomaranpiwi peitorobiwatsi. Matautano catatsi xua daxita carepaya pomonae icha jumeintha pecueicueijejiwi peitorobiwatsi. Matautano catatsi xua daxita carepaya nacuanpiwi peitorobiwatsi. <sup>8</sup> Barapon, pon be Corei wɔnae jaintatsi xua daxita carepaya po cae pin irathe nacuanpiwi wɔnae jainta. Barapomonae jopa wɔn dubenaeyo diborotha, po diboro pon Cordero xeina pecobetha, pon Mesías pon naetotha tupa. Barapo diborotha Nacom wɔn duba pejume cowantsiwichi caena bayatha poxonae Nacom aena forota nacua. Pomonae wɔn dubena barapo diborotha jopa weweracaeyo.

<sup>9</sup> Paxam pomonae painya nejume cowantsi jiwi pam. Icha pamuxu dubename, moya pajume naitaeware xua pocotsiwa Nacom pia Pejumoƿe tɔnaxɔ tatsi paca tsi-paeba xua meje:

<sup>10</sup> “Pomonae xua ichɔn waetabatsi xua atene peexanaenexatsi barapomonae xuya bara teicaeinchi ichamonae atene peexanaenexatsi tsane.

Pon xua cusitha namawainta xua ichɔn bexubatsi, bapon xuya cusitha bexubinchi”, paca jei Nacom pia Pejumoƿe tɔnaxɔ tatsi.

Daxota pomonae pejume cowuntsiwi Nacom bewa saya juntu coyene daunweya jinompae xua xuya jopa taexanae tsane ichamonaetha xua bequein abe taexanaeinchi ichamona. Yawano bewa jume cowanta dubenanaebiyaena Nacomtha.

<sup>11</sup> Bapoxonae tan ichun pon ayei pon be Metsametsawa. Bapon ira wejuina. Yawa mate ducua icha Cordero ichi pon oveja pebto penun. Daichitha poxonae cueicueije, be poxonae cueicueije pon be Joyoinya. <sup>12</sup> Bapon xeina peayapusu itorobi coyenewa, po peayapusu itorobi coyenewa xeina pon be Corei. Bapon pon be Metsametsawa, daxita jiwi itorobatsi xua wanae pejainchinexatsi pon be Corei, pon pia coutha nantasipa awanxaeibi exana. <sup>13</sup> Yawano pon be Metsametsawa exana nawita xua pexinya petsita itutsi coyenewa. Yawano bapon exana xua itorobica itaboco wetsica xua pocotsiwa be isoto xua po cae pin iratha tsique xua jiwi petaenexa. <sup>14</sup> Barapon pon be Metsametsawa petsita itutsi coyenewa exana pon be Corei peitabaratha tatsi. Barapo petsita itutsi coyenewantha bapon muxujainyaba xua muxujainyabatsi pomonae jinompa daxita carepaya nacuantha xua barapo cae pin nacuathe. Bapon pon be Metsametsawa itoroba jiwitha xua peexanaenexa ibo nacom xua canaxobiya exana pon be Corei, pon xua xeina pentasipatha xua dejona wan, pon bequein wan ducua, ichitha jopa tupaeyo. <sup>15</sup> Barapon pon be Metsametsawa peitorobi coyene catatsi xua asu exana barapo ibo nacom pon be Corei. Poxonae barapo ibo nacom asu tsane, cueicueije tsane yawa jutebina daxita pomonae jopa wanae jainchichi. <sup>16</sup> Yawano bapon itoroba ichuntha xua daxita cobe juma tinaeinchi po cobein pecoxa weya, yawa xua ichacuihitha itapa tinaeinchi, xua pomonae jopa ainya cuiyiyo, irun pomonae xua peainya cui jiwi, iru pomonae xua copei

pexeinae jiwi, iru pomonae peacopeibi jiwino, yawano pomonae pia coutha penata exanae jiwi, irano pomonae xua pebusi tatayebebiwichi. <sup>17</sup> Dapon aibi pon itacupatsi xua piawan comoca yawa xua caenaeta piawan icha jopa xeinaeyo barapo pecobe juma tinaewa. Barapo pecatinaewa pon be Corei pewan tatsi, ichacuitha barapo pecatinaewa saya número xua pewan tatsi pia número tatsi.

<sup>18</sup> Beta pananta xeinare xua yabara painya neyaputaenexa baxuan. Pon xua yaputane baxua bu bapon yabara nanta xeina xua pon be Corei pia número tatsi. Barapo número jupa xua pebin pewan. Barapon pon be Corei pia número tatsi baxue: seiscientos sesenta y seis.

## 14

*Meje yabara po diwesi xua pomonae naxuna* 144, 000 po bicheitomonae matabuxube

<sup>1</sup> Baroxonae tan Cordero xua oveja pebto penan xua uncua demxuwatha, po demxuwa pewan Sión. Barapo Cordero baru uncua ciento cuarenta y cuatro mil po bicheitomonae matabuxube. Barapo ciento cuarenta y cuatro mil po bicheitomonae matabuxube daxita carepaya itapa tinatsi barapo Cordero pia wan tatsi, yawano xua Paxa tatsi pia wan tatsino. <sup>2</sup> Baroxonae jume tan pejume itaboco wetsica. Barapo pejume bichocono jume daunwei be poxonae xua ainya pin menein busin xua poxonae tajun wemene othopeica. Yawano be poxonae xua yamuxu nameta, yawa be poxonae ainya busin xua pinmonae tanbaba. <sup>3</sup> Barapomonae pomonae tanbaba pexeinya wei naxuna Nacom pia pexeinya peecaethopaewa itabaratha tatsi, xuano xua barapo cuatro poyobe peitabaratha tatsi xua xuan asu, yawano xua

pitiri jiwi pia peitabaratha tatsi. Ichamonae jopa itacupaetsi barapo wei xua peyaputaewa xua po wei naxuna barapomonae. Saya jame barapomonae, pomonae ciento cuarenta y cuatro mil po bicheitomonae matabuxube yaputane barapo wei xua pomonae po irathepiwi jiwamonae, pomonae bayatha Cordero capanenebiya abe pia peexanaewan weya poxonae tsitupa barapomonae. <sup>4</sup> Barapomonae jopa nataxobiyo xua penasi cui exanaewa xua yabuxitha pejeinya enaexae. Yawano barapomonae exaneiba daxita xua pocotsiwan Cordero itoroba xua poxonae barapomonae napuna poneiba ichaxota Cordero poneiba. Barapomonae capanenebiyatsi, Nacom capanenebiya xua daxita carepaya jiwi jiwamonae tatsi xua bapomonae pecana exanaenexatsi pomonae bichocono pepa pejuntũ coyene xanepanaewi Nacomtha irũno Cordero tha pomonae xua copiya, pomonae xua Nacom pejume cowũntsiwichi. <sup>5</sup> Barapomonae jopa penaerabiwi tsipei barapomonae bichocono pepa pejuntũ coyene xanepanae jiwi, Nacom peitabaratha tatsi. Barapomonae jopa xeinaeyo xua penatsicuentsiwa Nacom peitabaratha tatsi xua abe peexanaexae.

*Meje yabara po diwesin xua cueicueijeji acoibi poyobe matatsunpiwi*

<sup>6</sup> Bapoxonae tan ichũn matatsunpin xua pupuna itabocotha. Barapo matatsunpin capana pexeinya jume diwesi po diwesi xua ataya tsiteca, po diwesi xua jiwi pecapanenebiwatsi abe pia peexanaewan weya. Barapo diwesi daxita carepayan jiwi nexa: pomonae daxita nacuanmonaepiwi nexa, irũno pomonae tsicamonaexipiwi nexa, irũno pomonae barompaya icha jumein pecueicueijejiwi nexa, irurũ daxita tomaranpiwi nexano. <sup>7</sup> Barapon jume daunweya paeba, jeye: “Pacunuwiya jinompare Nacom xua beta painya nejume cowũntsiwa. Yawano Nacom

wūnae pajainde. Tsipei anoxuae nama barapo matacabi patopa po mataqueitha Nacom yabara paebina jiwi xua penatsicuentsiwa xua abe peexanaexae. Wūnae pajainde pon exana itaboco, xuano xua exana pin mar mene, yawa exana ira buxūpana mene”, jei barapon pon jume daunweya paeba.

<sup>8</sup> Ichūn matatsunpin cotacaya patopa, bapon jeye: “¡Bayatha Babilonia tomarapiwi wetaxotsi po tomara pepa tomara, tsipei barapo tomarapiwi bichocono abe exana! ¡Barapomonaе cuiduba ichamonae xua ichamonae abe peexanae coyene peexanaenexa xua penasi cui exanaewa tsane yabuxitha, xua irū pebiwitha!” jei matatsunpin.

<sup>9</sup> Bapoxonae ichūn matatsunpin patopa, bapon jume daunweya jeye: “Icha ichūn wūnae jainta ibo Corei nacomtha xua saya canaxoba yawa icha itapa tinatsi, yawa ichacuitha xua icha cobe juma tinatsi, bapoxonae Nacom bichocono casebina bapon xua bapon casebinchi.

<sup>10</sup> Bapoxonae Nacom bichocono abe exanaena bapon. Baxua Nacom exanaena xua bayatha bapon peyabara nacui wūnaetsixaetsi. Jopa juniya exanae tsane poxoru bichocono Nacom yabara anaepana. Barapon bichocono atene tsane poxonae Nacom tautsina barapon isototha, yawa xua po tsuxū, tsuxū daena, po tsuxū pewūn azufre matawūn. Nacom baxua exanaena pia matatsunpiwi peitabaratha tatsi yawa Cordero peitabaratha tatsi. <sup>11</sup> Po isototha Nacom tautsina bapon, barapo iso tsuxū athabe jujuneibiyaena ataya. Barapo petautsiwa jopa itacūpae tsainchi xua pewetsiwa mataqueithano, yawa merawithano. Barapo isototha tautinchi pomonaе pon be Corei wūnae jaintatsi xuano xua barapo ibo Corei nacom wūnae jaintatsi, yawano xua barapomonaе itapa tinatsi barapo Corei pia wūntha tatsi”, jei matatsunpin.

<sup>12</sup> Pomonae exana dubenanaebiya po coyene Nacom itoroba pia peitorobi coyenewantha, yawano xua Jesús beta jume cowanta dubenanaebiyatsi, barapomonae apara xaniwaicha Nacom piamonae tatsi. Barapomonae tsita itapeinya xeina xua Nacom piamonaetsi tsipei barapomonae bepijawa jopa aitaconaeyo xua peewatsiwa pocotsiwa bexa Nacom exanaena pomonaetha, pomonae abe exana Nacom piamonaetha tatsi.

<sup>13</sup> Bapoxonae jume tan pejume xua peitaboco wenebaraichica. Nejei: “Baxua tinare: ‘B̄ bara j̄nt̄u coyene weiweina pomonae jume cowantsiya werapaena Jesth̄a, pon̄ j̄wi Pecanamataxeinaein’, jei”, nejei.

Nacom pia Pejumope t̄nax̄u tatsi jeye: “Aa baxua. Yawa wetsina pia penacuichiwan po penacuichiwan Nacom taexainchi yawa nafifina ewatsina Nacom pia nacuatheicha. Po coyene xua barapomonae j̄nt̄u coyene xanepana dubenanaebiya, yawa po coyene xua barapomonae beta taexana dubenanaebiya xua ichamonae taexana dubenanaebiyatsi, barapo j̄nt̄u coyene barapomonae yawa ponaena Nacom pia nacua beicha tatsi”, jei Nacom pia Pejumope t̄nax̄u tatsi.

*Meje yabara po diwesi xua matatsunpiwi cusin caucuboba po cae pin irathe tsique*

<sup>14</sup> Bapoxonae equeicha tan tsaquinaebowa xua inyapana. Barapo tsaquinaebo jumatha eca ponxae itaboco wetsica pona, ponxae Nacom peitapetsinxae. Bapon mataina tepa, yawa comaeca pocotsiwa be cusi xua xuiyoi.

<sup>15</sup> Bapoxonae icha matatsunpin Nacom pin pia bo weya pona. Bapon jume daunweya wawai pon tsaquinaebo jumatha eca beya, jeye: “¡Barapo cusi caucubobare yawa jore pocotsiwa xua naweta tsipei barapo matacabi patopa, po mataqueitha naweta po cae pin irathe deque!” jei matatsunpin. <sup>16</sup> Bapoxonae pon tsaquinaebowatha eca

yawa xua cusi comaeca, barapo cusi caucuboba po cae pin irathe, daxita canacui wetsiya exana.

<sup>17</sup> Bapoxonae equeicha ichun matatsunpin Nacom pin pia bo weya pona xua itaboco weya. Barapo matatsunpin cusi capona, po wato bichocono xuiyoi. <sup>18</sup> Bapoxonae equeicha icha matatsunpin pocotsiwa be pexaethopaewa weya pona ichaxota duwei tauteiba xua tuxusi exaneiba Nacom nexa. Barapo matatsunpin canamataxeina xua tauta pecana exanaewa. Barapo matatsunpin iru cusi xeina, po wato xuiyoi. Yawa bapon jume daunweya wawai icha matatsunpin beya pon iru pia wato xeina cusi. Bapon jeye: “¡Barapo cusi caucubobare yawa nore uva preparun xua po cae pin irathe deque dubena tsipei bayatha naweta!” jei barapo matatsunpin. <sup>19</sup> Nexata barapoxonae barapo matatsunpin cusi caucuboba yawa nota uva preparun. Yawa barapo uva preparun bebaireca pin pecacubi fetotha xua pemene yucaenexa barapo uva cuei. Icha jiton ichi xua bichocono daunweya cuba uva cuei, bara jata ichi Nacom jiwitha, xua poxonae bichocono atene exanaena jiwitha xua abe peexanaexae jiwi. <sup>20</sup> Barapo uva cuei tomara juma beya cuba. Barapo pecacubi feto wetsina jujuina petsobia mera, be pocotsiwa pejana, beya xua cawayu ponxo jayeichatsi yawa xua iratha iya xua tajü beya xua trescientos po kilómetrobe. Icha jiton ichi uva cuei xua tomara juma beya cuba Nacom jiwitha barichi tsane bichocono atene exanaena pomonaetha pomonae abe peexanaewitha, beya poxonae pejanan tajü ayei tsoponae tsane.

## 15

*Meje yabara po diwesi xua matatsunpiwi capana siete po coyenewabe xua po coyenewa peabe cui coyenewa*

<sup>1</sup> Bapoxonae equeicha tan peitabocotha icha pin pet-sita itãtsi coyenewa xua nebenaeca. Tan siete poyobe matatsunpiwi yawa xua cajjinca siete po cui coyenewabe xua po coyenewa peabe coyenewan. Poxonae weta xua exana barapo matatsunpiwi barapo siete po peabe cui coyenewabetha bapoxonae Nacom nacui weta xua poxonae anaya bichocono atene exana jiwi abe peexanaexae.

<sup>2</sup> Bapoxonae tan pocotsiwa be pin mene mar, po pin mene mar copiya tan. Barapo pin mene mar icha be bosibũ muxupawa ichi xua penthiya. Yawa tan xua muxunaxuba pocotsiwa be isoto xua itadudubiya. Yawa tan pomonae amanayaba xua pon be Corei amanayabatsi. Barapomonae jopa wũnae jainchiyo pon be Corei yawa pon be ibo Corei nacom, yawano jopa itapa tinaetsi pon be Corei pewũtha. Barapomonae imoxoyo caquita umena barapo pin mar mene. Yawano barapomonae caumena arpa matawũn xua pocotsiwa pecatanbabiwan xua Nacom catsiba. <sup>3</sup> Barapomonae naxũna Moisés pia wei tatsi, pon Nacom pia penacuichiwa tatsi taexainchi. Yawano barapomonae naxũna Cordero pia wei tatsi, barapo naxobe weibe jeye:

“Pata Nacom, pon jiwi Necanamataxeinaein, daxita xam exaname bichocono peainya cui coyenewa yawano bichocono wũnae.

Xam pon, daxita neayapusũ itorobiya coyenewan xeiname.

Jinya coyenewan bara pexainyeiwan poxoru beta exaname.

Xam itorobiya neewatsin daxita carepaya nacuanpiwi.

<sup>4</sup> Xam pon jiwi Necanamataxeinaein.

Daxita jiwi junuwiya cabarũ cui itura jinaena.

Yawano daxita jiwi wũnae cajainchina tsipei



saya meisa xam nejuntũ coyene xeicaem.  
 Daxita carepaya nacuanpiwi patsina xua wũnae  
 necajainchinexa tsipei barapomonaе bayatha tane  
 pocotsiwa xua betiya xanepanaya exaname”,  
 jei barapomonaе.

<sup>5</sup> Bapoxonaе equeicha tan peitabocotha Nacom pin pia bo. Po boyo tututha uncua barapo Nacom pin pia botha tatsi po boyotha ichaxota Nacom popona, barapo tutu nacoibo saranaxuba. <sup>6</sup> Barapo tutu weya matatsunpiwi pona pomonaе xua siete poyobe yawa capona siete po coyenewabe xua peabe cui coyenewan. Yawano nama xataba paparuwan, po paparuwan bichocono inyapana yawano daedaena. Yawa naepa paba pocotsiwan be coreinya bocoton xua beya jũntacari jayabeinatsi. <sup>7</sup> Bapoxonaе tan caein, xua jiwana barapo cuatro poyobe xua xuan asũ. Bapon barapo siete poyobe matatsunpiwi catsibatsi coroton xua wũnba po coyenewan peabe cui coyenewan pocotsiwan Nacom exanaena, pon ataya popona. <sup>8</sup> Bapoxonaе barapo tututha, bichocono petsũxũ wũnca. Barapo tsũxũ Nacom pia xainya weya tatsi tapichapatsi pon peainya cuin yawa xua peayapusũ itorobi coyenewa pexeinaein. Dapon aibi pon pecopatsiwatsi xua pejoniyaewa barapo tututha poxonaе cataunxuae jopa wetsiyo barapo siete po coyenewabe po coyenewan peabe cui coyenewan xua matatsunpiwi capona.

## 16

*Meje yabara po diwesi xua barapo corototha xeina siete po coyenewabe po coyenewa xua peabe cui coyenewan*

<sup>1</sup> Bapoxonaе jume tan xua jume daunweya wawai barapo tutu weya, xua wawai barapo siete poyobe matatsunpiwi beya, jeye: “Paponare po cae pin irathe deque, yawa barapo siete po coyenewabe po coyenewan xua

peabe cui coyenewan xua xeina barapo coroton juntututha baxua paepababare bara bereca. Po coyenewan xua corotontha tsijuntututha xeina baraxuan po coyenein xua Nacom bichocono atene exanaena jiwi penatsicuentisixae xua abe peexanaexae Nacomtha”, jei.

<sup>2</sup> Matatsunpin pon xua ichaxota ba “uno”, jei, bapon copiya piawa epataba. Bapoxonae pomonae itapa tinatsi xua pon be Corei pewun tatsi, xuano xua wnae jainta ibo Corei nacom, bapomonae barapoxonae nainya xeina xua peaperubewan xua bichocono aperutane.

<sup>3</sup> Bapoxonae equeicha icha matatsunpin pon ichaxota ba jei “dos”, jei, bapon piawa epataba pin mar mentha. Bapoxonae barapo pin mar mene bichocono mene janowanaya be poxonae xua peturpaein boca. Barapo pin mar mentha daxita werapa xua xuan baxota jinompa.

<sup>4</sup> Bapoxonae equeicha ichun matatsunpin pon xua ichaxota ba jei: “tres”, jei, bapon piawa epataba meneintha yawa ira buxurana meneintha, bapoxonae barapo menein be pejanan tsanaya. <sup>5</sup> Bapoxonae jume tan barapo matatsunpin xua yapucauncua barapo menein. Bapon jeye:

“Nacom maisa xaniwaicha betiya yabara  
 paebame poxonae atene exaname jiwi xua  
 penatsicuentisixae xua barapomonae  
 bichocono abe peexanaewi.  
 Bapana jopa abe exanaem.  
 Xam nejuntu coyene xeicaem,  
 yawa xua pon anoxuae nepoponaem,  
 yawa xua pon caena bayatha nepoponaemno.

<sup>6</sup> Tsipei barapomonae jinyamonae jutebatsi,  
 yawano tsipei jutebatsi pomonae  
 neitorobi jume pepaebiwi.

Daxota barapomonae xuya werapa exaname,

peyantomatsiwa exaname abe peexanaexae copiya”,  
 jei barapo matatsunpin Nacomtha.

<sup>7</sup> Equeicha ichun jume tan pon cueicueijeji pon uncua ichaxota pocotsiwa be pexaethopaewa xua ichaxota tauteiba duwei xua tuxusi exaneiba Nacom nexa, bara weya jeye: “Xam, Nacom pon jiwi Necanamataxeinaem daxita peayapusu itorobi coyenewan nexeiinaem. Tsipei xam yabara paebame xua jiwi penatsicuentisiwa xua abe peexanaexae daxota bewa atene tsane. Pocotsiwa xua exaname bara xaniwaicha betiya exaname, tsipei bapana jopa abe exanaem”, jei pon xua paeba.

<sup>8</sup> Bapoxonae equeicha icha matatsunpin pon ichaxota ba jei “cuatro”, jei, bapon piawa epataraba xometotha. Barapo matatsunpin xometo catatsi po coyene xua xometo exanaena xua jiwi petautsinexatsi xua xota bichocono atsa. <sup>9</sup> Bichocono daxita carepaya jiwi taxuatsi. Ichitha barapomonae icha juntu coyene jopa xeinaeyo matautano Nacom jopa wuna jainchichi, yawa barapomonae Nacom abe yabara paebatsi yaitama Nacom xeina peayapusawa xua itoroba barapo coyenewan po coyenewan xua peabe cui coyenewa.

<sup>10</sup> Bapoxonae equeicha icha matatsunpin pon ichaxota ba jei: “cinco”, jei, bapon piawa epataraba pon be Corei pia peecaethopaewatha tatsi. Yawano barapon pon be Corei po coyene xua itoroba piamonae jopa xapain piamonae matabaponaeyo be pon xua pona poxonae quireitha. Daxota piamonae tatsi juntu coyene deideijeji. Barapomonae peparaxaewa nawano sine. <sup>11</sup> Jopa juniya exanaponaeyo barapo coyenewan po coyenewan xua peabe cui coyenewan, yawano cataunxuae barapomonae exanapona xua Nacom abe yabara paebatsi po Nacom itabocotha eca. Daxota barapomonae Nacom abe yabara

paebatsi yaitama Nacom barapo peatene cui coyenewa itoroba yawano xua itoroba peaperutanewan.

<sup>12</sup> Bapoxonae equeicha icha matatsunpin pon ichaxota ba jei “seis”, jei, bapon piawa epataraba po pin mene mentha pewan Eufrates. Barapo Eufrates mene namto naexaniya xua pepatsinexa pomonae pocotsiwa werenepiwi pomonae jiwi itorobiya pia pepa peewatsiwichi.

<sup>13</sup> Nexata bapoxonae tan xua pon be jomowabi, pon Joyoinya. Iru tan pon ayei, pon be Corei. Iru tan pon xua naerabiya jeye: “Xan Nacom peitorobi jume tapaebin”, pon jei. Daxita barapomonae barompaya pia coiboton tsina tajujinatsi acoibi poyobe cauri xua xuan be pocotsiwan cuei. <sup>14</sup> Barapo caurimonae exana pexeinya petsita itutsi coyenewan. Barapo caurimonae pon арґсґра xua penacaetuta exanaenexa daxita pomonae jiwi itorobiya pia pepa peewatsiwichi. Baxua exana xua naba pexanaenexa po mataqueitha Nacom nabenabe pon jomowabi pon Joyoinya. Barapon Nacom daxita peayapusu itorobi coyenewan pexeinaein.

<sup>15</sup> Nacom jeye: “Taema, jemeicha patopaein icha be pon pecaibin ichi poxonae jemeicha patopa. Juntu coyene weiweina pon xua yoyoca tsipei nama xatata paparuwa xua jopa petamsa ponaenexa jiwi itutha xua bapon petawatsi daxita pia pepon”, jei Nacom.

<sup>16</sup> Daxita pomonae jiwi itorobiya pia pepa pecanamataxeinaewichi, barapomonae nacaetuta ichaxota po iratha pewan Armagedon xua hebreo jumetha. Barapo iratha nacaetuta xua naba peexanaenexa xua po mataqueitha Nacom nabenabe pon be jomowabi, pon Joyoinya.

<sup>17</sup> Bapoxonae equeicha ichan matatsunpin pon ichaxota ba jei “siete”, jei, bapon piawa epataba barapo irathe

matatsun susatoha. Bapoxonae itabocotha xua tutu wet-sica ichaxota Nacom pia pexeinya peecaethopaewatha baxota jume tan pon xua jume daunweya cueicueiyeiya jeye: “Bara bayatha nacui xainwaetaba”, jei pon xua paeba. <sup>18</sup> Bapoxonae bichocono jerajerei itabocotha, yawa pejumein, yawa bichocono jurujurei. Matautano bichocono ira jijiyata beyacaincha xua poxonae ira jijiyateiba poxonae copiya jiwi aena naexana po cae pin nacuathe xua beya anoxuae. <sup>19</sup> Po tomara, pepa tomara barapo tomara ainya wanbe exanabe poxonae baxua ira jijiyata. Icha iranthe barichi baxota tomaran abe exana. Nacom yabara nanta xeina Babilonia tomara tsipei barapo tomarapiwi abe peexanaewi. Daxota Nacom barapo pepa tomara abe exana poxoru bichocono anaepana barapomonaetha. <sup>20</sup> Daxita petunaeton yawano daxita demxuwan aichurubena xua ira pejjijiyatsixae. <sup>21</sup> Barichino itaboco weothopeica xua jiwi matatsun othopeicatsi pocotsiwan dederawa xua xuan benata ichaxota po eman bichocono aque. Barapo pedederawian bichocono arewe. Bapoxonae barapo jiwi Nacom bichocono abe yabara paebatsi yaitama Nacom itoroba barapo pedederawian pocotsiwa bichocono abe barapomona nexa.

## 17

*Meje yabara po diwesi xua Nacom itaweta powa xua bichocono penasi cui matacaetsiwa xua weiweina pia paratixichi powa xua yabara caunutatsi Babilonia tomara*

<sup>1</sup> Nexata bapoxonae taxantha patopa caein matatsunpin jiwana, po matatsunpiwi siete poyobe yawa xua siete xoyobe matauta capona coroton. Bapon nejei: “Anetha catsita itutinchi xua yabuyo powa bichocono penasi cui matacaetsiwa xua weiweina. Barapowa eca ichaxota pin

mar mene, powaxae xua yabara caunutatsi Babilonia tomara. <sup>2</sup> Pomonae jiwi itorobiya pia pepa peewatsinchi barapo cae pin nacuathe barapomonae yawa muxuna abe nanabarũ exana bapowa. Matautano daxita carepaya pomonae po cae pin irathe jinompa barapo coyene exana bara jupa, icha barapomonae ichi. Barapowa cana exana xua barapo jiwi abe exana, tsipei barapo jiwi ichichipa po penasi cui matacaetsiwa bapowa exana”, nejei matatsunpin.

<sup>3</sup> Poxonae cataunxuae Nacom pia Pejumoŋe tunaxũ tatsi netsita ituta baxua, bapoxonae matatsunpin necapana ira xuepana susato tsurucuae nacua beya. Baxotiya petsiriwa tan xua eca pon ayei pon be Corei bapon pejumatha, xua pon tsobia. Bapon daxita carepaya pepontha tinaduba po jumein xua Nacom abe yabara paebatsi. Yawano bapon siete po matasipabe xeina yawa diez po pentetobe xeina. <sup>4</sup> Bapowa nama xatata paparuwa, po paparuwa mũ sũjei yawa mũ tsobia. Bapowa yawa napepena xua pocotsiwan pewũn oro nain, yawano be ibotixi xua pocotsiwan ainya matoman, yawano po warowa xu inyapana xua po warowa xu pewũn perla. Barapowa pecobetha xeina coroto penain coroto xua oro nain yawa wũnta pocotsiwan xua be mara, yawa barapowa pia penasi cui matacaetsi coyene xua weiweina. <sup>5</sup> Powa xua yabara caunutatsi Babilonia tomara, barapowa peitapatha tinaduta pewũn, po wũn jiwi jopa yabara yaputaeyo. Barapo wũn jeye: “Powa xua yabara caunutatsi pepa Babilonia tomara, bapowa be coxiwa natsicotane, xua powaxi nasi cui matacaeta xua weiweina barapowaxi pena tatsi. Mataũta bapowa daxita pomonae xua bichocono abe peexanaewi barapomonae pena tatsi”, jei xua tinaduta. <sup>6</sup> Pirapaeyo jume tan xua barapo Babilonia tomarapiwi yabara jeichi: “Icha

pebin ichi xua peatsaxae mera bichocono cūpatsi, barapo Babilonia tomarapiwi barapocotsi coyeneya jūta ichiya exana. Baxua exana, tsipei barapo Babilonia tomarapiwi juteba pinmonae pomonae Nacom pijimonae tatsi, irū pomonae Jesús pejume diwesi pepaebiwi”, yabara jeichi barapo Babilonia tomarapiwi.

Poxonae tan xua barapo tomarapiwi be cūpatsi bichocono, yabara nabenaecan bapoxonae. <sup>7</sup> Bapoxonae matatsunpin nejei: “¿Eta xua metha nabenaecame? Yabara cayaputane exanaeinchi bapowa xua pocotsiwa jopa yaputaem. Yawano yabara cayaputane exanaeinchi barapon pon be Corei, pontha xua bapowa eca peumatha. Bapon siete po pentasipabe xeina xuano xua diez po pentetobe xeina. <sup>8</sup> Barapon pon be Corei pon taneme caena bayatha popona barapo cae pin nacuathe. Anoxuae jopa poponaeyo. Ichitha bexa tsane juinaena po mūthū bichocono pin mūthū tsina. Bapoxonae nama yatsicaewa weweracaena. Bapoxonae jinompaena jiwi barapo cae pin irathe. Barapomonae jopa wūn dubenaeyo Nacom pia diborotha tatsi, po diborotha xua jei: ‘Pomonae wūn dubena barapo diborothe jopa weweracae tsane’, jei. Barapo jiwi caena bayatha jopa wūn tinaetsi barapo diborotha. Barapo jiwi poxonae taena barapon xua taeinchi pon be Corei bichocono najūntū coyene cabenaecaena. Daxota najūntū coyene cabenaecaena tsipei caena bayatha popona, xua anoxuae ajibi ichitha equeicha bexa patopaena xua peponaewa tsane barapo cae pin irathe”, nejei matatsunpin.

<sup>9</sup> Equeicha matatsunpin nejei: “Meje tha xua paebichi xua ichamonae itacūpatsi peyabara yaputaewa baxua: Barapo siete po pentasipabe xua pon be Corei, barapo siete matasipabe demxuwān yabara caunuta xua po matasipantha ichaxota barapowa peumatha eca, powa

xua Babilonia tomara yabara caunutatsi. Barichi barapo siete po pentasipabe xua pon be Corei, yabara caunutatsi pomonae jiwi itorobiya pia pepa peewatsiwichi. <sup>10</sup> Cinco poyobe barapomonae pomonae jiwi itorobiya pia pepa peewatsiwichi bayatha naitapataya werapoinca. Caein anoxuae barapo siete poyobe jiwana matacapona po cae pin irathepiwi, ichun bexa tsane patopaena xua matacaponaena barapo cae pin irathepiwi. Ichitha poxonae bapon patopaena jopa ainya dapaein matacaponae tsane po cae pin irathepiwi. <sup>11</sup> Bapon pon be Corei pon caena bayatha popona xua anoxuae jopa poponaeyo, bapon ichaxota ba jei: ‘ocho’, jei, bapon pon jiwi itorobiya pia pepa peewatsinchi naexanaena po cae pin irathepiwi nexa, bequein bapon caena bayatha tupa xua barapo siete poyobe jiwana. Bapoxonae nama equeicha weweracaena poxonae tupaena”, nejei matatsunpin.

<sup>12</sup> Equeicha matatsunpin nejei: “Barapo diez po pentetobe xua taneme xua po penteton yabara caunutatsi pomonae jiwi itorobiya pia pepa peewatsiwichi, barapomonae cataunxuae jopa patsiyo xua itorobiya peewatsinexatsi po cae pin irathepiwi. Ichitha po peitorobi coyenewa barapomonae catsibinchi xua saya bara caeto itorobiya ewatsinchi po cae pin irathepiwi xua iru barapon pon be Corei itorobiya ewatsina. <sup>13</sup> Barapo diez poyobe pomonae piamonae itorobiya pepa peewatsiwi peburaya nanta xeinarcupa. Matautano barapo diez poyobe pomonae piamonae itorobiya pepa peewatsiwi pia peayapusya exanaewan pon be Corei catatsi, yawano peayapusu itorobi coyenewa catatsi. <sup>14</sup> Daxita barapomonae pomonae diez poyobe, pomonae piamonae itorobiya pepa peewatsiwi iru pon be Corei, Cordero butsi. Ichitha barapo Cordero amanayabina daxita barapomonaetha. Tsipei barapon pon jiwi pia pepa Pecana-



mataxeinaeinchi pia peayapusu itorobi coyenewa xeina beyacaincha xua ichamonae xeina pomonae jiwi pecana-mataxeinaewichi. Matautano bapon pon Corderoxae jiwi itorobiya pia pepa Peewatsinchi tatsi pia peayapusu itorobi coyenewa xeina beyacaincha xua ichamonae xeina pomonae jiwi itorobiya pia pepa peewatsiwichi xua iru xeina pia peayapusu itorobi coyenewa. Pomonae Cordero nabarū yawenatsi xua poxonae amanayaba barapomon-aetha, Nacom waba barapomonae poxoru Nacom pia peitapetsiwichi tatsi, matautano tsipei exana pocotsiwa Nacom itoroba”, nejei matatsunpin.

<sup>15</sup> Equeicha barapo matatsunpin nejei: “Xua xam po menein taneme mar menein xua ichaxota yabuyo eca pon be Corei peumatha, barapo mar menein yabara caunutatsi be tomaramonaepiwi, xua yabara caunutatsi tsicamonaexipiwi, yawano yabara caunutatsi pomonae icha jumeintha pecueicueijejiwi, yawano yabara caunutatsi daxita nacuanpiwi. <sup>16</sup> Bayatha taneme barapon pon be Corei diez po pentetobe, po penteton yabara caunutatsi diez poyobe pomonae jiwi itorobiya pia pepa peewatsiwichi. Barapomonae pomonae jiwi itorobiya pia pepa peewatsiwichi barapowa bichocono casebinchi powa pesi cui weiweinaewa. Yawano wecobe pitinchi xua bapowa pia peitorobi coyenewa tatsi yawano jumasa xubinchi. Yawano barapomonae wi xaena, xua bapowa wi xaeinchi. Bapoxonae bapowa pia pepon tautinchi isototha. <sup>17</sup> Nacom itoroba xua barapomonae pia pejuntū coyenetha peexanaewa tsane xua pocotsiwan Nacom ichichipa. Daxota barapomonae pomonae jiwi itorobiya pia pepa peewatsiwichi pomonae diez poyobe, peburūya nanta xearūcūpa xua barapomonae pia peayapusu itorobi coyenewanxae tatsi pon be Corei catsinchi. Baxuan catsina beya abū poxonae wetsina

pocotsiwa Nacom bayatha paeba. <sup>18</sup> Petsiriwa powa taneme xua powa nasi cui matacaeta xua weiweina, bapowa cayabara caunutatsi: ‘Po tomara pepa tomara’, jei. Pon itorobiya pepa peewatsin xua barapo pepa tomaratha, bapon itoroba daxita ichamonae pomonae jiwi itorobiya pia pepa peewatsiwichi pomonae barapo cae pin nacuathepiwi itorobiya ewatatsi”, nejei matatsunpin.

## 18

*Meje yabara po diwesi xua daxita omeicha cayabara wetapentatsi Babilonia tomarapiwi xua muxuna tomarano*

<sup>1</sup> Bapoxonae equeicha tan ichun matatsunpin xua pon peitaboco wetsica pona po cae pin irathe tsique. Barapo matatsunpin xeina ainya peayapusu itorobi coyenewan. Bapoxonae bapon exana xua ira bichocono pentha tsurucaue xua pia pepon weya cueicha pona. <sup>2</sup> Yawano bapon jume daunweya wawai, jeye:

“¡Bayatha Babilonia tomarapiwi

wetapentatsi yawa tomara abe

exanatsi, po tomara pepa tomara!

¡Yawano anoxuae caurimonae baxota jinompa!

<sup>3</sup> Tsipei daxita carepaya nacuanthapiwi

bichocono abe exana, po abe peexanae

coyenewa pocotsiwa xua barapo

Babilonia tomarapiwi exana.

Yawano pomonae jiwi itorobiya pia pepa

peewatsiwichi barapomonae cuiduba piamonae

xua abe peexanaewa tsane icha barapo

Babilonia tomarapiwi ichi xua abe exana.

Yawano pomonae pecaenaetsiwi piawan, bapomonae

xuya copei pexeinaewi naexana, tsipei barapo

tomarapiwi copei ayei ichichipa xua beta

pejinompaewa tsane”, jei matatsunpin.

<sup>4</sup> Bapoxonae equeicha ichawa jume tan xua wawai itabocotha, jeye:

“Pomonae tamonaepiwi pam, barapo tomara weya paponarꝛꝛpare, xua jopa abe painya neexanaenexarꝛ icha barapo tomarapiwi ichi xua bichocono abe peexanaewi. Bapoxonae Nacom jopa paca atene exanae tsane icha bayatha ichichi xua atene exainchi barapo Babilonia tomarapiwi.

<sup>5</sup> Tsipei barapo abe peexanae coyenewan xua barapo tomarapiwi exana bichocono ayei xua daxota Nacom pon itabocotha peecaein tane baxuan.

Daxota Nacom yabara nanta xeina xua atene exana barapomonaetha.

<sup>6</sup> Barabꝛ ichamonae jꝛpa exanaena barapomonaetha, icha be pocotsi coyeneya xua bapomonae abe taexana ichamonaetha. Barabꝛ barapomonae pentoma catsibinchi xua po pentoma equeicha mataropataba xua peatenewa.

Barabꝛ barapomonae bichocono atene tsane, icha be pocotsi coyeneya xua poxonae barapomonae atene taexana ichamonaetha.

<sup>7</sup> Pocotsiwa xua bapomonae exana xua atsaca naexana xua penasi cui matacaetsi jiwi naexana, barabꝛ barapomonae bichocono atene tsane, yawa wecoyei tsane.

Tsipei bapomonae pia coutha natsipaeba, jeye:

‘Waxainchi xote enatsi.

Waxainchi jopa dapomonaetsi pomonaetsi pomonae waseuri jiwi wanaca cuenta werapaewi.

Mataꝛtano waxainchi pomonae jiwi

itorobiya pia pepa peewatsi jiwichi, jopa bichocono atene tsainchi', jei bapomonaе.

<sup>8</sup> Daxota saya caentaqueitha tsane jopaena po coyene xua abe peexanaewa tsainchi bapomonaе, xua bichocono peperaxa jabiwa tsainchi, matautano xua pejainpaewa tsane bichocono, yawano xua petautsiwa tsainchi xua werapaena. Tsipei Nacom pon pepa Pecanamataxeinaein jiwi peayapusu itorobi coyenewa xeina, yawano bapon pia coutha yabara paebina po coyene xua tsitatsi xua bapomonaе natsiaenaе cuenta abe peexanaexae", jei matatsunpin.

<sup>9</sup> Pomonaе jiwi itorobiya pia pepa peewatsiwichi xua po cae pin irathe, pomonaе xua bayatha iruru abe exana poxonaе barapo Babilonia tomarapiwi abe exana, barapomonaе bichocono wecoyei tsane poxonaе xua taena iso tsuxu xua poxonaе barapo Babilonia tomarapiwi tautsinchi. <sup>10</sup> Barapomonaе taju wetaeumeinyaena poxoru cunuwa xua pocotsiwa Nacom cana exanaena barapo Babilonia tomarapiwi. Barapomonaе pomonaе jiwi itorobiya pia pepa peewatsiwichi najei tsane:

"¡Pai jaibo Babilonia tomarapiwi pam tsobenae!

¡Babilonia tomara tsocuaem!

Bequein pepa tomara tsocuaem, ichitha saya

bara cae horatha barapo tomaram omeicha

Nacom cawetaxubina", najei tsane barapomonaе.

<sup>11</sup> Daxita pomonaе caenaeta piawan barapomonaе bichocono wecoyei tsane xua barapo Babilonia tomara siwa wecoyeichi tsainchi tsipei barapomonaе jopa xeinaе tsane xua comocaeinchi xua pia pecaenaetsiwan. <sup>12-13</sup> Barapomonaе xua pocotsiwan caenaeta dubenanaebiya baxue: xua pocotsiwan rewun oro nain matawun, yawano xua pocotsiwan

penainwan xua plata nain matawun, yawano xua ira buxurana iboton xua bichocono ainya matoman, yawano xua pocotsiwan be warowaxu pocotsiwan perla matawun, yawano papaburu pocotsiwan bichocono ainya matoman pocotsiwan seda matawun, yawano po paparuwan mu sjei, yawa xua xuan mu tsobia; yawano napaewan, po naein xua bichocono tuxuei; yawano xua ichawan weya forobano xua pocotsiwan marfil matawun, yawano xua ichawan weya forobano xua naewan xua po naewan bichocono ainya matoman, yawano xua ichawan weya forobano xua pocotsiwa bronze nain matawun, yawano xua ichawan weya foroba xua penainton, po penainton hierro nain matawun, yawano xua ichawan weya foroba xua iboton, po iboton marmol ibo matawun; yawano capana po petuxueiwan canela tseboco matawun, yawano ichawanno capana xua ichawan xua petuxueiwan; yawano capana icha petuxueiwan xua incienso xua po tuxusi tuxueiwa benata poxonae taxua exana, yawano icha petuxueiwa pocotsiwan be mauto xua jiwi tauta petuxusi tuxuei exanaenexa, yawano icha petuxueiwanno; yawano vino meran, yawano penasiwan, yawano pebenon xua trigo xu benon, yawano pepa xu xua trigo xu; yawano jota duweimonaein, ovejamonaein, cawayumonaein, yawa caronaemonaein, xua cawayu pecaponae naexi, yawano jiwino capoinchi pecaenaetsinexatsi xua pomonae jiwi pebusi cui tatayebeibiwichi peexanaenexa tsainchi. <sup>14</sup> Barapomonae jei tsane xua barapo Babilonia tomarapiwi yabara jei tsainchi:

“¡Anoxuae jopa paxeinaem pethei, po pethei ainya matoman po pethei paichichipame bichocono!  
 ¡Anoxuae nama pacata aichurubenaes xua copei xeina painya nenaexanaewam xua

bara ataya tsane!” jei tsane.

<sup>15</sup> Pomonae xua caenaeta dubenanaebiya pocotsiwan xua ainya matoman yawa xua cobe caewita paratixi xua barapo tomarapiwi cobe caewitatsi, barapomonae tajũ wenewatumendena xua abe peexanaeyainwatsi xua Namcom exanaena. Barapomonae bichocono wecoyei tsane.

<sup>16</sup> Barapomonae jei tsane:

“¡Pai jaibo pepa Babilonia tomara tsobenae!

Xam Babilonia tomaram bichocono pexeinya tomaram, icha yabũyo ichi xua pexeinyawayo poxonae paparuwa nama xatata po paparuwa bichocono sũjei yawa bichocono tsobia.

Yawano bapowa napepena xua pocotsiwa pewũn oro nain yawa xua be ibotixi xua pocotsiwan ainya matoman yawano po warowa xu xua inyapana xua pewũn perla.

<sup>17</sup> ¡Saya bara cae horatha daxita aichurubenaes xua xuan barapo tomara xeina!”

jei tsane barapomonae.

Pomonae jera pecanamataxeinaewi, yawano pomonae xua naponae xua warapa icha tomaratha nexa, irũ pomonae petanacuichiwi barapo jera naeintha, irũno pomonae nacuita jeratha, daxita barapomonae tajũ wenecotumendena. <sup>18</sup> Poxonae barapomonae tane xua iso tsũxũ xua barapo Babilonia tomara tautatsi, barapomonae jume daunweya wawai, jeye: “Icha pepa tomara aibi po tomara wũnae pocotsi tomara icha Babilonia tomara ichi”, jei. <sup>19</sup> Barapomonae pia cui xeina xua tsorobotha nantatsaeba poxoru bichocono wecoyei. Wawaya jeye:

“¡Pai pepa Babilonia tomara tsocuae!

¡Anoxuae jopa peraichiwa xua pocotsiwan bayatha jera wũnbatsi xua copei xeina naexainchi

xua poxonae naca comoca barapo tomarapiwi!  
 ¡Daxita baxuan caayawachurucuae  
 exainchi tomara!” jei barapomonaе.

<sup>20</sup> Ichitha paxam pomonaе itabocotha  
 painya nejinompaewi pam iru pomonaе  
 tamonaе pam, iru pomonaе Jesús pia  
 peitorobiwi tatsi pam, iru pomonaе Nacom  
 peitorobi jume pеpaеbiwi pam.

Daxita barapomonaе pam, pajuntu coyene  
 weiweinare xua pacata peaichurucuaexae  
 barapo Babilonia tomara.

Nacom xuya abe exana barapo Babilonia  
 tomara tsipei bayatha barapo tomarapiwi  
 pacata abe exana.

<sup>21</sup> Bapoxonaе matatsunpin pon bichocono pia peaya-  
 pusu itorobiwa xeina, bapon pita iboto, po iboto bi-  
 chocono pin iboto xua be pocotsi ibototha jiwi cuba trigo  
 xu. Bapoxonaе barapo matatsunpin xuba barapo iboto  
 pin mar mentha. Bapon jeye:

“Icha barapo iboto ichin xua xuban barapo  
 pin mar mentha, Nacom barichi wetaxuba  
 barapo Babilonia tomara xua equeicha  
 jiwi jopa petaewa tsane.

<sup>22</sup> Yawano bapana equeicha jiwi jopa jume  
 tae tsane xua petanbabiwan busin xuan  
 pewun arpa matawun, yawano xuan po  
 peobiwa jumein pewun flauta matawun,  
 yawano icha peobiwan jumein xuan  
 pewun trompeta matawun.

Matautano jopa tae tsane pomonaе xua  
 barompaya piawan penata exanaе jiwi.

Matautano jopa busi tae tsane barapo  
 pin tomaratha xua busi  
 xu yacatoyeraba trigo xu xua pin ibototha.

<sup>23</sup> Matautano jopa yonoyonei tsane pecoichan.  
 Matautano jopa jume tae tsane xua pin  
 penabanaewa exana xua poxonae  
 pebin pecotsiwa pita.  
 Pomonae pecaenaetsiwi barapo pin tomaratha  
 bichocono copei pexeinaewi xua daxota  
 daxita nacuanpiwi yabara cui yaputane  
 xua barapomonae peainya cui jiwi.  
 Barapomonae pomonae Babilonia tomarapiwi  
 itacupatsi xua daxita nacuanpiwi  
 muxuitorobatsi mara peexanaewi pia  
 coyenyatha xua daxota iru abe  
 peexanaenexa tsane, icha barapo Babilonia  
 tomarapiwi ichi xua abe exana”,  
 jei matatsunpin.

<sup>24</sup> Nacom weraweraca exanaena barapo tomara.  
 Barapo tomarapiwi Nacom tsitatsi xua barapomonae  
 penatsicuentsiwa xeina xua ichamonae pejutebixaetsi,  
 pomonae Nacom pia peitorobi jume pepaebiwi,  
 iru pomonae Nacom pejume cowuntsiwichi tatsi  
 yawano daxita pomonae bayatha jutebatsi po cae pin  
 nacuanthepiwi xua ichamonae juteba icha tomarantha.

## 19

<sup>1</sup> Bapoxonae peitabocotha jume tan xua juinya pin-  
 monae jeye:

“¡Barabu Nacom wuna jainatsi, Nacom naca  
 capanepa abe waexanae coyenewan weya!  
 ¡Maisa Nacom pexeinya juntu coyene pexeinaein!  
 ¡Maisa Nacom bepa juniya xeinae  
 peayapusu itorobi coyenewa!

<sup>2</sup> Nacom wuna jaintatsi tsipei bapon Wanacom.  
 Poxonae yabara paeba jiwi xua  
 penatsicuentsiwa xua abe peexanaexae,



bara beta xaniwaicha exana.  
 Yawano bapon bichocono atene exana  
 barapowa powa xua penatsicuentsiwa  
 xeina xua abe peexanaexae.  
 Bapowa penasi cui matacaetsiwa xua  
 weiweina pebiwitha pia paratixichi.  
 Barapowa yabara caunutatsi Babilonia tomara  
 po tomaramonae xua penatsicuentsiwa xeina xua  
 abe peexanaexae icha bapowa ichi.  
 Bapowa bayatha cuiduba barapo cae pin  
 nacuapiwi xua iru abe exana icha  
 xua barapowa ichi.

Tsipei bapowa Nacom pijimonae tatsi  
 jutebatsi daxota xuya Nacom pijimonae  
 yantomata xua poxonae bapowa bexotsi powa  
 peyabara caunutsixaetsi Babilonia  
 tomarapiwi”, jei xua juinya pinmonae.

<sup>3</sup> Barapo pin ayei jiwi jeye:

“¡Barabu Nacom wuna jaintatsi!  
 ¡Iso tsuxu xua bapomonae tautatsi barabu  
 bapana jopa athabe jujuinae tsane xua pepu  
 ataya tsane!” jei barapomonae xua juinya pinmonae.

<sup>4</sup> Bapoxonae veinticuatro poyobe pomonae pitiri jiwi,  
 iruru cuatro poyobe xua xuan asu daxita barapomonae  
 irabe taeumenareca xua Nacom wuna pejainchinexa  
 tsainchi, jeye: “¡Je bara ichi tsane! ¡Barabu Nacom  
 wuna jaintatsi!” jei daxita barapo matabuxumonaebe.

<sup>5</sup> Bapoxonae Nacom pia pexeinya peecaethopebiwatha,  
 jume tan pejume, xua jeye:

“¡Daxita pam, pomonae Nacom pata exaname,  
 Nacom pon pata Nacom, wuna pajainde!  
 ¡Irru pomonae paexaname pocotsiwa Nacom  
 paca itoroba, Nacom wuna pajainde!  
 ¡Irru pomonae peacopeibi jiwi iruru

pomonae copei pexeinae jiwi, daxita  
paxam Nacom wɔnae pajainde!”  
jei pejume xua paeba.

*Meje yabara po diwesi xua poxonaе jiwi tsinacaetuta pex-  
aewa penabanaenexa poxonaе Cristo, pon Cordero, pecotsiwa  
nacueyaba*

<sup>6</sup> Yawano jume tan peitabocotha xua pejumein be pin  
bicheitomonaе be poxonaе xua ainya pin mar menein  
busin, yawano be xua xuan yamɔxɔ jurujurei. Barapo  
jumein jeye:

“¡Barabɔ Nacom wɔnae jaintatsi  
pon jiwi Pecanamataxeinaein!  
Bapon nama anoxuae tamropata pitaba  
xua daxita carepaya nacuanthapiwi  
itorobiya ewatsinchi.

Bapon xeina daxita coyenewan xua pia  
peayapusɔ itorobi coyenewan.

<sup>7</sup> ¡Juntɔ coyene weiweinatsi yawano  
jacobatsi, jeichichi: ‘Maisa pexeinya  
juntɔ coyene pexeinaein’, jeichichi!  
Baxua bewa exanaetsi tsipei patopa matabi  
poxonaе po matabitha jiwi tsinacaetuta  
pexaewa penabanaenexa poxonaе pon  
Cordero, piowa nacueyaba.

Barapon pon Cordero, pecotsiwa tatsi nacui  
xainwaeta, poxonaе po matabitha jiwi  
pin penabanaewa tsinacaetuta xua  
penabanaewa tsane.

<sup>8</sup> Barapowa copatatsi xua penama xatatsinexa  
paporuwa, po paporuwa bichocono  
pexeinya paporuwa.  
Barapo paporuwa bichocono inyapana yawa  
xua bichocono mɔ daedaena.

Barapo pexeinya paparuwa caunuta xua po coyenein Nacom pia peantobewichi tatsi exana xua po coyenein Nacom tsita xanepanatsi.

Barapo yabũyo yabara caunutatsi Nacom pijimonaē tatsi, pomonaē Nacom pejume cowũntsixaetsi”, jei barapo pin bicheitomonaē.

<sup>9</sup> Bapoxonaē matatsunpin nejei: “Tinare xuaje: ‘Bichocono jũntũ coyene weiweina pomonaē Nacom waba poxonaē pin penabanaewa tsinacaetuta xua penabanaewa tsane poxonaē pon Cordero, nacueyaba pecotsiwa’, jande poxonaē xua tiname”, nejei barapo matatsunpin. Equeicha nejei: “Daxita po jumein xua catsipaebatsi barapo jumein xaniwaicha Nacom paeba”, nejei barapo matatsunpin.

<sup>10</sup> Bapoxonaē barapo matatsunpin petaxutha irabe taecuarecan xua wũnaē tajainchinexa. Ichitha bapon nejei: “¡Bara! Jopa baxua neexanaeinde. Apra xan irũ ponxaein Nacom piawa taexanaein, icha xam ichim xuano xua icha jinya jiwimonaē ichi pomonaē Nacom pejume cowũntsiwichi, xuano xua jume cowũnta dubenanaebiya pocotsiwan xuan Jesús paeba. Jame Nacom bapon wũnaē jainde”, nejei matatsunpin.

Baxuan xuan pocotsiwan Jesús paeba xua xuan pexainyeiwan, baxuantha yawenatsi nawita pomonaē Nacom peitorobi jume pepaebiwi.

*Meje yabara po diwesi xua pebin equeica cawayutha, pon pemaĩnyan*

<sup>11</sup> Bapoxonaē peitabocotha tan xua naitaboco yausaranaxuba. Baxota naitũta cawayu, pon pemaĩnyan. Pon xua cawayutha equeica, wũn dutatsi, jeichichi: “Pon xua pejume cowũnta ducuaenaebiyaēin, yawano xua xaniwaicha pepaebin”, jeichichi. Bapon xainyeya betiya yabara paeba jiji xua penatsicuentaēsiwa xua abe

peexanaexae. Matautano bapon xainyeya betiya exana poxonaе naba ichamonaetha. <sup>12</sup> Bapon peitamaiqueito be isoto itareto xua yonoyonei. Yawano bapon nantatsun etounya pentasipatha ainya tepan. Yawano bapon tinaduta pewun po wun xua saya meisa bapon wun yaputane. <sup>13</sup> Yawano nama xatata paparuwa, po paparuwa pejanan dubena be poxonaе xua jautuxuba pejanatha. Bapontha Nacom wun duta: “Nacom Pejume”, jei. <sup>14</sup> Bapon puna poinchi soldadomonaе itabocopi soldadomonaе, pomonaе Nacom pia soldadomonaе tatsi. Barapo soldadomonaе pexeinya paparuwan nama xataba xua xuan mu inyapana, yawa xua axuiruibi. Yawano barapomonaе eneica cawayumonaeintha xua xuantha pemainyawantha. <sup>15</sup> Barapon pon mata capana pia soldadomonaе pecoiboto tsina tapichapeinatsi cusi, po wato bichocono xuiyoi. Bapon barapo watotha ucuboba xua jiwi ucubobatsi, pomonaе po irathe jinompe. Yawano bapon ajumeyapusya itorobi ewatsina jiwi. Yawano bapon daunweya yabara paebina jiwi xua penatsicuentsiwa xua abe peexanaexae, icha jiton ichi xua daunweya nataxu tsapabatouba uva cuei xua vino mera pia exanaetsi. Bapon bichocono atene cana exanaena pomonaetha pomonaе jopa pejume cowuntsiwichi, tsipei bichocono Nacom caseba barapomonaе. Barapon Nacom pia peayapusu itorobi coyenewan xeina xua jiwi peperaxa exanaewatsi. <sup>16</sup> Bapon nawun tinaduta pia pejumainaewatha, yawa nawun duta pethutotha xua po wun jeye: “Pon Corderoxae jiwi itorobiya pia pepa Peewatsinchi tatsi, pia peayapusu itorobi coyenewa xeina beyacaincha xua ichamonaе xeina pomonaе jiwi itorobiya pia pepa peewatsiwichi xua iru xeina pia peayapusu itorobi coyenewa. Matautano bapon pon jiwi pia pepa

Pecanamataxeinaeinchi pia peayapusu itorobi coyenewa xeina beyacaincha xua ichamonaе xeina pomonaе jiwi pia pepa pecanamataxeinaewichi”, jei barapo wun.

<sup>17</sup> Bapoxonaе matatsunpin tan xua xometo coichatha uncuа, bapon jume daunweya wawai peyapupunaewi beya xuan jinompa itabocotha, jeye: “Anetha xua painya nexaewa tsane Nacom pin pia penabanaewa. <sup>18</sup> Barapo penabanaewan paxaema, xua pomonaе jiwi itorobiya pia pepa peewatsiwichi pewi, yawano soldadomonaе pia pentacaponaewi tatsi barapomonaе pewi, yawa pomonaе peamanayabeibi jiwi barapomonaе pewi, yawa cawayu pewi, yawa pomonaе xua eneica pewi. Daxita xua iru ichamonaeno barapomonaе pewi. Iru pomonaе penata exanaewi pia coutha barapomonaе pewi, ichacuitha xua iru pomonaе amanaya petanacuichi jiwi barapomonaе pewi. Iruno pomonaе jiwi pebusi cui tatayebeibiwichi barapomonaе pewi, iruno pomonaе copei pexeinaewi barapomonaе pewi”, jei matatsunpin.

<sup>19</sup> Bapoxonaе tan pon ayei pon be Corei, yawano tan pomonaе jiwi itorobiya pia pepa peewatsiwichi xua baru pona pia soldadomonaein. Daxita barapomonaе nacaetuta xua nantiya penabinexa tsane pontha pon pia soldadomonaе maticapona xuano yawa pia soldadomonaeintha tatsi petanabinexa tsainchi. <sup>20</sup> Barapon pon ayei, pon be Corei, bapon maxu cubiya waetabatsi iru maxu cubiya waetabatsi pon naerabiya jeye: “Xan Nacom peitorobi jume tapaebin”, jei, pon xua petsita itutsi coyenewan exana xua pon be Corei taexanatsi xua pon be Joyoinya pia peayapusu itorobi coyenewatha tatsi. Barapo petsita itubiwantha bapon jiwi muxuitorobatsi xua barapo jiwi peitapa tinaewa tsainchi barapon pon be Corei pewuntha tatsi. Yawano jiwi itorobatsi xua wunaе pejainchiwa tsane ibo Corei nacom. Barapon pon be Corei

iruru pon xua naerabiya jeye: “Xan pon Nacom peitorobi jume tapaebin”, jei baponbe Nacom cana exana xua itowa pexubiwa tsainchibe ichaxota isoto pucuatha. Barapo pucua ataya tsitecaeya taxuncua bichocono aitareyapusu tsuncuae po peitare pewun azufre matawun. <sup>21</sup> Iruru daxita ichamonaeru jutebatsi cusitha, po watotha xua pecoibototha tapichapeinatsi pon xua matacapona pia soldadomona. Daxita pepupunaewi bichocono tonsana pewi xaexaetsi pomona xua jutebatsi.

## 20

*Meje yabara po diwesi xua Cristo itorobiya ewatsina jiwi mil po weibetha*

<sup>1</sup> Bapoxonae tan matatsunpin xua peitaboco wetsica pona, bapon catatsi po coyenetha xua itacupatsi xua pecoibo saranaxubiwa tsane barapo pin muthu deca xua ira bereca. Yawa bapon capona pecobetha penainto, po penainto xua pewun cadena xua bichocono pin nainto. <sup>2</sup> Barapo matatsunpin waetaba, pon be Joyoinya waetabatsi, pon po jomo xua poxonae copiya jiwi muxu jainyabatsi. Bapon apara caurimona pia pentacaponaein tatsi. Bapon icha wun Satanás. Barapon Satanás maxu cubiya waetabatsi cadenatha xua mil po weibexa. <sup>3</sup> Yawano barapon Satanás xorecatsi barapo pin muthu deca. Bichocono yauxatatabotatsi muthutha. Yaucateitabotatsino bichocono, xua jopa equeicha pemuxujainyabeibiwa tsane xua jopa equeicha pemuxujainyabeibiwa tsainchi po irathepiwi xua beya poxonae abu yaru caewina mil po weibexa. Bapoxonae isanaxubinchi xua saya bara caeto tsane.

<sup>4</sup> Bapoxonae tan xua pexeinya peenaethopeibiwan. Baxota ena pomona xua bayatha catsibatsi peitorobi coyenewan xua jiwi peyabara paebiwa tsainchi daxita

xua penatsicuentsiwa xua abe peexanaexae. Bapomonae pomonae xua bayatha wisi ucubobebatsi xua ichamonae namawainta, apara xua barapomonae peyabara cueicuei-jeixae Nacom Pejume Diwesi, xua peyabara cueicuei-jeixaeno po coyene xua Jesús pejume cowuntsiwatsi. Barapomonae bayatha jopa wūnae jainchiyo pon be Corei. Matautano jopa wūnae jainchiyo barapo ibo Corei nacom. Matautano barapomonae jopa copatsiyo xua peitapa tinaewatsi tsainchi pon be Corei pia wūnthata tati ichacuihata xua pecobe juma tinaewatsi. Barapomonae tan xua equeicha asu exainchi. Barapomonae iru Cristo, naba ru caemonae xua barapomonaebe barapo cae pin nacuepiwi itorobiya ewatatsi xua cien po weibetha tsane. <sup>5</sup> Ichitha nama ichamonae pomonae xua caena bayatha werapa cataunxuae jopa asu exanaetsi. Barapomonae asu exanaeinchi beya abu poxonae yapu caewina mil po weibe. Barapo peasu coyenewa xua apara copiya nanta carucua xua copiya matha Nacom exana xua jiwi asu exaneibatsi petupaewa weya. <sup>6</sup> ¡Maise bichocono juntu coyene weiweina pomonae equeicha Nacom asu exana petupae coyene weya po peasu coyenewa xua copiya! Barapomonae Nacom piamonae tati. Barapomonae jopa werapae tsane poxonae equeicha jiwi caewa werapaena po jiwi jopa pejume cowuntsiwi. Saya barapomonae exanaeinchi Nacom pia sacerdotemonaepiwi tati xua iru Cristo pia sacerdotepiwi tati. Matautano barapomonae naba ru caemonae xua barapomonaebe barapo cae pin nacuepiwi itorobiya ewatatsi mil po weibetha tsane.

*Meje yabara poxonae caurimonae pia pentacaponaein tati xotsi*

<sup>7</sup> Poxonae yapu caewina mil po weibe bapoxonae barapo Satanás isanaxubinchi xua peponaewa tsane

mũthũ weya. <sup>8</sup> Poxonae bara weya pona jiwi muxu-jainyabinchi nawita daxita nacuantha. Yawano muxu-jainyabinchi nawita Gog nacuamonaepiwi, irũno muxu-jainyabinchi nawita Magog nacuapiwi. Barapo Satanás cana exana xua barapo naxobe nacuapiwi penacaetutsiwa tsane pia soldadomonaе tatsi xua penabinexa pomon-aetha pomonae Nacom piamonae tatsi. Barapo naxobe nacuapiwi pomonae soldadomonaexae barapomonae bichocono pin bicheitonmonaein icha taetowa p̄r̄r̄n ichi xuan taetabotha bobena xuan ac̄c̄c̄ xua mar mentha bobena.

<sup>9</sup> Barapo pin bicheiton pomonae soldadomonaexae, pana beiyiya daxita yaira j̄pa beya poxonae yacaincha matawacaicha umeinchi ichaxota Nacom piamonae tatsi jinompa, yawano xua po tomarapiwi Nacom jume cow̄ntatsi. Ichitha bapoxonae Nacom pin isoto itoroba deca peitaboco wereca, daxita barapo soldadomonaеin taxuatsi omeicha. <sup>10</sup> Barapon Satanás, pon be Joyoinya, pon caurimonae pia pentacaponaein tatsi, pon xua barapo soldadomonaеin muxujainyabatsi, bapon Nacom xuba isoto pucuatha, po pucuatha ichaxota ataya tsitecaeya taxuncua xua bichocono aitareyapusũ tsuncuae po peitare pew̄n azufre mataw̄n. Barapo pucuatha caena bayatha xotsi pon be Corei ir̄ũ pon xua naerabiya jeye: “Xan Nacom peitorobi jume tapaebin”, jei. Barapomonae baxota bichocono atene tsaibi tsane, mataqueitha yawa merawithano tsaibi tsane xua bara ataya tsane.

*Meje yabara po diwesi xua Nacom yabara paeba jiwi xua penatsicuentiwa poxonae eca pia pexeinya ecaethopeibiwatha, po pexeinya ecaethopeibiwa xua pemainyawa*

<sup>11</sup> Bapoxonae tan xua pexeinya peecaethopeibiwa xua pemainyawa. Muxuna tan xua pon eca barapo pexeinya peecaethopeibiwatha. Bapon peitabaratha tan ira



xua po ire yawa itaboco, baxua daxita aichurubena, equeicha jopa naitutsiyo. <sup>12</sup> Bapon Nacom peitabaratha tatsi umena pomonae xua caena bayatha werapa xua pomonae peacopeibi jiwi iruno pomonae copei pexeinae jiwi. Bapoxonae diboron patapenta, yawano pataxuba po diborotha ba nacapanenebiya tsaibi pomonae Nacom pia peantobewichi poxonae wun tinadubatsi barapo diborotha. Pomonae xua caena bayatha werapa daxita itawetatsi. Barapomonae yabara cui jupiya exanatsi be po coyeneya bayatha abe exana xua barapo diborotha pecui yabara tinaexaetsi xua poxonae barapomonae abe exana. Daxota barapomonae atene tsane. <sup>13</sup> Barichi pomonae iru pin mar mentha notatsi, barapomonae Nacomtha pata. Iru pomonae iratha bobena ira wejjuina xua Nacomtha pepatsinexa. Daxita barapomonae Nacom peitabaratha tatsi umena xua baxota peyabara paebinexatsi xua Nacom yabara paebina xua penatsicuentsiwa xua abe peexanaexae Nacomtha. Barapomonae atene exanaeinchi xua Nacom bayatha pecui yabara tinaexae po coyene xua abe exana. <sup>14</sup> Nacom cana exana po coyenewa xua jiwi tupa pecana exanaewatsi, xua barapo coyenewa isoto pucuatha xotsi xua nacaewita cana exanatsi. Barichi Nacom cana exana xua po nacia pomonae pewerapeibiwi pia nacia tatsi xua barapo nacia xotsi isoto pucuatha xua nacaewita cana exanatsi po pucuatha ichaxota ataya tsitecaeya taxuncua. Barapo petapae coyenewa apara xua jiwi caewa werapaena po jiwi jopa pejume cowuntsiwi. <sup>15</sup> Iru ru pomonae xua jopa wun dubenaeyo barapo diborotha po diborotha ba jiwi nacapanenebiya tsaibi poxonae wun dubeibatsi, barapomonae iru barapo isoto pucuatha bebaichi, Nacom bebai.

## 21

*Meje yabara po diwesi xua pena itaboco yawa xua pena ira*

<sup>1</sup>Bapoxonae tan pena itaboco yawano pena irano, tsipei po itaboco copiya ducua yawa po ira copiya ducua aichurubena, equeicha jopa naitutsiyo. Yawano pin mar mene aichurucuae. <sup>2</sup>Xan, pon Juan tsocuaein, tan Nacom pia pepa pexeinya tomara tatsi ichaxota jinompa pomonae peantobewichi Nacom. Barapo tomara pena Jerusalén tomara, po tomara Nacom pia xainya wetsica tatsi pona xua itaboco wetsica. Barapo tomara nacui xaxainchiya weta, icha yabuyo ichi xua poxonae nacui xaxainchiya weta xua poxonae pecotsiwa peru nacoyobina. <sup>3</sup>Jume tan pejume xua peitaboco wetsica jume daunweya jeye: “Taema anoxuae Nacom popona pebiwitha. Nacom baru poponaena, bara barapomonae Nacom pijimonae tatsi tsane. Nacom ataya tsitecaeya baru poponaena barapomonae penacana exanaexae xua piamonae tatsi pia Nacom tatsi. <sup>4</sup>Barapomonae Nacom itacuere mene canotsina xua pewecoyeixae, xua barapomonae equeicha jopa peatenewa tsane. Equeicha jiji jopa werapae tsane barapo petapae coyenewatha. Matautano jopa pewecoyeinexa tsane, tsipei xua xuan copiya exana po irathe bayatha aichurucuaeya nacaewita”, jei po jume xua itaboco wetsica paeba.

<sup>5</sup>Bapon Nacom pon eca pia pexeinya peecaethopawatha nejei: “Taema daxita exanan xua xuan penawan”, nejei Nacom. Equeicha nejei: “Baxuan tinare, tsipei barapo jumein pexainyei jumein, daxota ichamonae itacupatsi xua tana neyabara jume cowuntsiwa xua bara exanaein pocotsiwa xua taneme”, nejei Nacom.

<sup>6</sup>Bapoxonae equeicha nejei: “Bara baxuan bayatha nacui weta. Xan ponxaein apra ataya tsitecaeya tapoponaein xua poxonae aena daxita tamropata pitaban.

Matautano bexano ataya tsitecaeya bara tapoponaewa tsane. Po pebin xua bichocono meratsipa xua daxota bara amanaya mera neapatsiwa barapo coyenewa icha be ichin poxonaе jiwi yawenan. Pon xua bejuntũ coyene jichatsi xua ajuntũcoyenyapusũ peexanaewatsi bara bapon amanaya catsin peajuntũcoyenyapusũwa, po peajuntũcoyenyapusũwa xua ataya tsiteca. <sup>7</sup> Pon xua juntũ coyene amanayaba caurimonae poxonaе caurimonae bequein abe exana bapontha, bapon xeinaena pocotsiwa be pentoma pocotsiwa xua bayatha jũntana jeban bapon. Barapon pia Nacom tatsin tsane yawa barapon apara bara taxanto tsane. <sup>8</sup> Ichitha pomonaе pijunuwi jopa nejume cowũntsiyo xua ichamonaе abe peexanaewa tsane barapomonaetha irũrũ pomonaе jopa benejume cowũntsiyo, irũrũ pomonaе peajuntũcoyenebewi, irũrũ pomonaе jiwi pejutebiwi, irũrũ pomonaе xua penasi cui exanaewi xua peweiveinaewa, irũrũ pomonaе mara pexeinaewi irũrũ pomonaе wũnae pejainchiwi ibo nacom, irũno pomonaе naerabiya pepaebiwi, daxita barapomonaе bebai tsainchi isoto pucuatha po pucuatha ichaxota ataya tsitecaeya taxuncua xua bichocono aitareyapusũ tsuncuae po peitare pewũn azufre matawũn. Barapo petũpae coyenewa apara xua poxonaе equeicha jiwi caewa werapaena pomonaе pejume cowũntsiwi”, jei Nacom pon eca pia pexeinya peecaethopaewatha.

*Meje yabara po diwesi xua pena Jerusalén tomara*

<sup>9</sup> Bapoxonaе matatsunpin patopa pon xua siete poyobe jiwana, po siete poyobe matatsunpiwi xua xeina coroton siete xoyobe xua wũnba peabe cuiru coyenewan xua bara nama opi ducua pocotsiwa Nacom exanaena. Bapon nejei: “Anetha catsita itũtsinchi Cordero pecotsiwa tatsi xua bara yatsicaya piowa tatsi”, jei matatsunpin. <sup>10</sup> Tananetsita itũtsiwatha xua poxonaе Nacom pia

Pejumope t̄naxu tatsi netsita ituta bapoxonae matatsunpin necapona pin demxuwa beya po demxuwa xua bichocono taucha. Yawano baxotiya matatsunpin netsita ituta Nacom pia pepa pexeinya tomara tatsi ichaxota jinompa pomonae peantobewichi Nacom. Barapo tomara pena Jerusalén tomara, po tomara Nacom pia xainya wetsica tatsi pona xua itaboco wetsica. <sup>11</sup> Barapo tomara bichocono w̄nae xua pentha exanuncua Nacom pia pexeinya it̄panae coicha tatsi, tsipei Nacom baxota popona. Barapo pepentha tsuncuae coichawa bichocono daedaena icha iboto ichi xua po iboto it̄pana po iboto ira b̄x̄pana iboto. Bara pocotsi it̄panae iboto jaspe mataw̄n, po iboto xua epa nasaba. <sup>12</sup> Barapo Jerusalén tomara yacaincha matawacaichiya uncuatsi xua pocotsiwa be curara xua u ibo xua bichocono am̄x̄bur̄tiȳ xuano xua bichocono taucha. Yawano xeina doce po coibotobe. Daxita barapo coibotontha tsiniya umena matatsunpiwi, xua be caein tsiniya. Barapo coibotontha tsitsiniya w̄n dudubenapoinya Israel pia pemomoxi susato bicheiton tatsi. <sup>13</sup> Matautano acoibi po coibotobe ducua ichaxota pocotsiwa xometo weecoina. Icha acoibi coibotobe ducua ichaxota pocotsiwa xometo bejopiya. Yawano epatauta dena ainya acoibibe po coibotobe nantiya ducuabe. <sup>14</sup> Yawano barapo curaratha ira wetsina umena iboton. Barapo iboton doce po ibotonbe xua barapo ibotontha tsiniya w̄n dubena pew̄nxi xua doce poyobe pomonae Cordero pia peitorobi jiji tatsi.

<sup>15</sup> Barapo matatsunpin, po matatsunpin netsipaeba, bapon capatopa pocotsiwa xua pecacanaubiwa xua be naewa xua oro nainto peepa canaubinexa tomara yawa pecoiboton yawa curara. <sup>16</sup> Tomara nantiya nam̄x̄bur̄ j̄pabe xua apiya dena. Barapo matatsunpin epa can̄barena barapo tomara dos mil doscientos po

kilómetrobe xeina xua apiya dena yawa xua taucha xua asiyeicha daxita baxuan nantiya naera jura. <sup>17</sup> Baroxonae epa canauba curara m̄xub̄m̄ sesenta y cinco po metrobe xeina xua pem̄xub̄m̄ xua aitiya. Baxuan matatsunpin exana be jiwi pia pecanaubiya coyenewa tatsi.

<sup>18</sup> Curara iboton ̄ xuan pexeinya iboton, xua ira b̄x̄-pana iboton xuan jaspe mataw̄n. Tomara acaba ̄ xuan pocotsiwan oro mataw̄n be xuan peera nasabiwan. <sup>19</sup> Po iboton ira weumeina xua doce po ibotonbe, daxita mata pepena xua mata w̄nae exana icha be iboton ichi pocotsi iboton ainya matoman. Po iboto copiya barapo iboto mata pepena xua jaspe iboton mataw̄n. Po iboto ichaxota ba “dos”, jei, barapo iboto mata pepena xua zafiro ibo mataw̄n. Po iboto ichaxota ba “tres”, jei, barapo iboto mata pepena ágata ibo mataw̄n. Po iboto ichaxota ba “cuatro”, jei, barapo iboto mata pepena esmeralda ibo mataw̄n. <sup>20</sup> Po iboto ichaxota ba “cinco”, jei, barapo iboto mata pepena ónice ibo mataw̄n. Po iboto ichaxota ba “seis”, jei, barapo iboto mata pepena cornalina ibo mataw̄n. Po iboto ichaxota ba “siete”, jei, barapo iboto mata pepena crisólito ibo mataw̄n. Po iboto ichaxota ba “ocho”, jei, barapo iboto mata pepena berilo ibo mataw̄n. Po iboto ichaxota ba “nueve”, jei, barapo iboto mata pepena topacio ibo mataw̄n. Po iboto ichaxota ba “diez”, jei, barapo iboto mata pepena crisoprasa ibo mataw̄n. Po iboto ichaxota ba “once”, jei, barapo iboto mata pepena jacinto ibo mataw̄n. Po iboto ichaxota ba “doce”, jei, barapo iboto mata pepena amatista ibo mataw̄n. <sup>21</sup> Barapo doce po boupanbe exana ̄ xuan be perla mataw̄n xua daxita barompaya peboupan tsiniya. Barapo pepa namto xua tomaratha exana ̄ pocotsiwa xua xuan be oro nainton xua xuan peera nasabiwan poxoru

xua be pepa oro nainton.

<sup>22</sup> Barapo tomaratha jopa taeinyo Nacom pin pia bo tatsi tsipei bara Nacom baxota pepoponaexae po Nacom daxita pia peayapusu itorobi coyenewan xeina. Iruru xua baxota pepoponaexae Cordero daxota jopa nantawenon-aeyo Nacom pin pia bo tatsi. <sup>23</sup> Barapo tomara jopa nantawenonaeyo xometo xua tomara pentha peexanaewa tsane yawano xua jomocoichatono, tsipei Nacom baxota popona peyacoicha jinaexae xua barompaya pia pexeinya pecoichaxae tatsi, xuano iruru xeina Cordero barapo coicha. <sup>24</sup> Pomonae xua bayatha Nacom capanenebiya, barapomonae barapo coichatha ponaena barapo tomaratha po coicha Nacom pia coicha. Daxita pomonae jiwi itorobiya pia pepa peewatsiwichi barapomonae Nacom catsibinchi barapo tomaratha po coyene xua Nacom wuna pejainchiwatsi po coyene xua tsita exanatsi xua bayatha jiwi tsita exana barapomonaetha. <sup>25</sup> Peboupan jopa bapana coibo xatababanobi mataqueitha, xua baxota jopa ataya tsitecaeya pequirei tsaibi tsouneibixae. <sup>26</sup> Daxita nacuanpiwi Nacom capona barapo tomaratha xua Nacom pecatsibiwa tsainchi pocotsiwan pewunaewan xua be copei. Matautano Nacom catatsi po coyene xua Nacom wuna pejainchiwatsi. <sup>27</sup> Ichitha xua xuan peabe coyenein bapana jopa patsi tsane barapo tomaratha. Matautano jopa patsi tsane baxota pomonae abe peexanaewi iruru pomonae pemuxuitorobiwi. Saya meisa patsina baxota pomonae wan dubena po diborotha ba jiwi nacapanenebiya tsaibi poxonae wan dubeibatsi baxota, xua po diboro xeina Cordero.

## 22

<sup>1</sup> Nexata matatsunpin netsita ituta mene, po mene xua mene itarana, po mene xua jiwi axumerasu exanatsi,

xua icha Nacom ichi xua jiwi ajuntucoyeneyapusu ex-  
 anatsi. Barapo mene bichocono mene itarana icha bosibu  
 ichi xua epa nasaba, baxua xua Nacom pia pexeinya  
 peecaethopeibiwa werena pona, yawano xua Cordero pia  
 pexeinya peecaethopeibiwa tatsi werena pona. <sup>2</sup> Barapo  
 mene, mene ducuaponarena pepa namto dena tomaratha.  
 Barapo mene dena nantiya ainya muxunene denabe  
 naein xuwa xua po naein jiwi ajuntucoyeneyapusu ex-  
 ainchi. Barapo naein nacoiteiba doce po cuiyobe xua  
 cae weitha. Daxita xometontha nawetouneiba. Barapo  
 naein noxuton jiwi yawenatsi xua jantema pejinompaewa  
 xua jopa peatenewa. <sup>3</sup> Barapo tomaratha jopa xeinae  
 tsane xua peabe coyenein. Barapo tomaratha uncuaena  
 Nacom pia pexeinya peecaethopeibiwa tatsi iru bax-  
 ota uncuaena Cordero pia pexeinya peecaethopeibiwa  
 tatsi. Pomonae Nacom pia petanacuichiwichixaetsi  
 barapo tomaratha barapomonae Nacom wunae jainch-  
 inchi. <sup>4</sup> Bapoxonae jiwi Nacom itabara taeya cueicueije  
 tsainchi. Barapomonae peitapatha cainompaena Nacom  
 pewun tatsi. <sup>5</sup> Barapo tomaratha ataya tsitecaeya jopa  
 quirei tsounae tsaibi tsane. Pomonae baxota jinompa  
 jopa nantawenonae tsane pecoicha xua lampara coicha  
 xuano xua xometo coichano. Daxota jopa nantawenon-  
 aeyo tsipei Nacom pon jiwi Pecanamataxeinaein baxota  
 popona, barompaya pia pecoicha peyacoicha jinaexae xua  
 pia pepontha. Iru pomonae baxota jinompa jiwi itorobiya  
 ewatsinchi xua ataya tsitecaeya tsane.

*Meje yabara po diwesi xua Jesucristo poxonae patopeicaena  
 xua imoxoyo bara nama*

<sup>6</sup> Bapoxonae equeicha matatsunpin nejei: “Barapo  
 jumein pexainyei jumein. Daxota ichamonae itacupatsi  
 xua tana neyabara jume cowuntsiwa xua bara exanaein  
 pocotsiwa xua taneme. Pon jiwi Pecanamataxeinaein

bapon Nacom itoroba pia Pejumope t̄nax̄ tatsi xua jiwi peyawenaewa tsainchi xua poxonaē jiwi cueicueijeji Nacom nexa. Yawano Nacom itoroba pia matatsunpin xua petsita it̄tsinexa pomonaē pia penacajume caitorobi diwesi tatsi petacueicueijeichiwichi xua barapo matatsunpin barapomonaē yabara petsipaēbinexatsi po coyene Nacom imoxoyo exanaenaba”, nejei.

<sup>7</sup> Equeicha matatsunpin nejei xua saya Jesús tapaebatsi, jeye: “¡Bara nama imoxoyo patopeican! ¡J̄nt̄ coyene weiweinaena pon xua exana xuan pocotsiwan Nacom ichichipa xuan pocotsiwan paeba po diborothe!” jei barapo matatsunpin xua Jesús tapaebatsi.

<sup>8</sup> Xan, pon Juan tsocuaein, tan daxita baxuan yawano jume tan. Poxonaē bayatha jume tan, yawa xua bayatha tan xua pocotsiwan matatsunpin netsita it̄ta, bapoxonaē bapon petaxutha irabe taeuncuarecan xua w̄naē tajainchinexa bapon. <sup>9</sup> Ichitha bapon nejei: “¡Bara! Jopa baxua neexanaeinde. Apra xan ponxaein taexanaein Nacom piawa tatsi, icha xam ichim yawa icha pomonaē jinya jiwimonaē ichi, pomonaē Nacom peitorobi jume pepaēbiwi, ir̄no pomonaē xua jume cow̄nta dubenanaēbiya daxita po coyenein xua po diborothe tinan. Jame Nacom bapon w̄naē jainde”, nejei matatsunpin.

<sup>10</sup> Yawano nejei: “Jopa moya yaw̄n xeinaeinde Nacom Pejume Diwesi, xua xuan pocotsiwan paeba po diborothe. Tsipei imoxoyo nama Nacom exanaena xua pocotsiwan po diborothe pepaēbixae. <sup>11</sup> Poxonaē cataunxuae Nacom jopa wetsiyo, pon xua abe peexanaein, b̄ moya bara abe exana ducunaēbiya. Ir̄ pon xua nanth̄ coyene xeina peacuirucoyenebewan, b̄ moya bara baxuan nanta xeina ducunaēbiyaena. Ichitha pon w̄naē exana Nacom nexa, b̄ moya exana ducunaēbiya. Pon xua Nacom petsita naexanaewatsi xua penth̄th̄ xeicaein penaexanaewa,



bū moya bara Nacom jume cowūnta ducuaenaebiyatsi”, nejei.

<sup>12</sup> Bapoxonae Jesús jeye: “Aa, bara nama imoxoyo patopeicaein. Capatopeicaein pocotsiwan be pentoman, xua caeintha barompaya piawan catsibin. Pon xua nawita inta exana xuya nawita catsin. Pon xua be conotha inta exana xuya be conotha catsin. <sup>13</sup> Xan ponxaein apara ataya tsitecaeya tapoponaein xua poxonae aena daxita tamropata pitaban. Matautano bexano daxita coyenein wetsin tsipei ataya tsitecaeya bara tapoponaewa tsane”, jei Jesús.

<sup>14</sup> Juntū coyene weiweinaena pomonae najuntū coyene cui barapenta peabe coyenewan. Baxuan be poxonae barapomonae pia paparuwan matanaca xua jopa tsoreiyo. Bapoxonae barapomonae itacūpaeinchi xua jojoniyaena tomara coiboto iya tsipei pia paparuwan inyapana yawa juntū coyene wūnae. Yawa barapomonae itacūpaeinchi xua tomaratha iya xaena po pethei pexaewa, po pethei jiwi ajuntūcoyenesū exainchi. <sup>15</sup> Ichitha nama aisowatha xua tomara jumatha umenaena pomonae peajuntūcuiuru-coyenebewi irūnū pomonae mara pexeinaewi. Yawano pesatotha umena pomonae penata siwa xeinaewi yabūx-itha, irūno pomonae jiwi pejutebiwino, irūno pomonae ibo nacom wūnae pejainchiwi. Daxitano pomonae becuī jichatsi xua naerabiya pepaebiwi xua naerabiya exanano, barapomonae pesatotha umenaena.

<sup>16</sup> Equeicha Jesús nejei: “Xan, pon Jesús, itoroban tamatatsunpin xua daxita baxuan pepaebinexa pomon-aetha pomonae pejume cowūntsiwi. Xan bara yatsicaya David pia pemomoxi susato jiwi jiwānapin tatsin, pon David Israel nacuapiwi itorobiya pia pepa peewatsinchi tatsi. Icha be jarawato ichi poto xua bichocono wūnae xua poto baya ecoina poxonae icha matabi patopa, xan

barichin. Patopan tacapatopaenexa jiwitha po coyene xua bichocono w̄nae po coyene xua Nacom tsiexana, xua jiw̄i tsiexanatsi”, nejei Jesús.

<sup>17</sup> Nacom pia Pejumoꝑe t̄nax̄u tatsi, ir̄u Cordero pia pecotsiwa tatsi, pomonaē Nacom pia pejume cow̄untsi-wichixaetsi, jeye Jesustha: “Anetha”, jei Nacom pia Pejumoꝑe t̄nax̄u tatsi ir̄u Cordero pia pecotsiwa tatsi. Pomonaē xua ir̄ur̄u jume tane, jeye: “Anetha”, jei. “Xan Juan paeban pon xua meratsipa yawa beapaena, moya antha, b̄u apa po mera jiw̄i aj̄unt̄uyapus̄u exainchi xua saya amanaya nexa”, jan.

<sup>18</sup> Daxita pomonaē xua jume tane barapo diwesi xua Nacom Pejume Diwesi xua barapo diborothe tinan barapomonaē tsipaeban, meje baxue: Icha ich̄un matarope-icha paeba icha diwesi xua jopa xainyeyo xua po diwesithe, bapoxonaē bapontha Nacom itorobina peabe coyenewan be pocotsi coyene cuirun yabara caunuta po diborothe. <sup>19</sup> Icha ich̄un jiwana jume wexuba xua po diborothe paeba, xuya Nacom pia diborothe w̄n xubina, po diborothe jiw̄i nacapanenebiya tsaibi poxonaē w̄n dubeibatsi baxota. Yawano Nacom jopa copatsiyo xua bapon pepatopaewa Nacom pia pepa pexeinya tomaratha tatsi po tomara pena tomara ichaxota jinompa pomonaē peantobewichi Nacom. Barapo pecapanenebiya coyenewa ir̄u barapo tomarano barapo diborothe yabara tina.

<sup>20</sup> Jesús pon pia matatsunpin peitorobixae xua barapo matatsunpin yabara tana netsipaebiwa pocotsiwa xua bexa exanaena, bapon nejei: “Aa, bara nama imoxoyo patopeicaein”, jei.

Je, moya anetha patopeinca xam, Jesús, ponxaem Tanecanamataxeinaem, jan.

<sup>21</sup> Jesucristo, pon jiw̄i Pecanamataxeinaein, barab̄u paca yawenaena pia painya nepaca caantobexae daxita

APOCALIPSIS 22:21

91

APOCALIPSIS 22:21

paxam. Je bara ichi tsane.  
Baja Juan.

Nacom Pejume Diwesi po diwesi pena jume diwesi xua  
Jesucristo yabara tinatsi  
New Testament in Cuiba

copyright © 2010 Wycliffe Bible Translators, Inc.

Language: Cuiba

Translation by: Wycliffe Bible Translators, Inc.

### Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cuiba

**© 2010, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

---

PDF generated using Haiola and XeLaTeX on 14 Jun 2022 from source files dated 30 Nov 2021

e9c4c3a0-6dec-54a4-aaba-fb395e5eddc7